

T 1819 / 4334.8(5)

法華文句

卷九上
之十下
終

HARVARD-YENCHING LIBRARY
HARVARD UNIVERSITY
2 DIVINITY AVENUE

Gift of Mrs. James B. Platte
DEC 27 1968

妙法蓮華經文句卷第九上

天台智者大師說

黃梅

哈佛大學
圖書館
珍藏
印

非遠非近文爲三一總標境智二別釋三結成觀者
中道觀智也一切法者十法界境也若單論智智無
所觀故舉一切以顯皆空如實去別釋也二邊三諦
無一異名如非七方便故名實以實爲相故言如實
相不顛倒者無八倒也不動者不爲二歿所動也不
退者心心寂滅入薩婆若海也不轉者不如凡夫轉
生歿不如二乘轉凡聖如虛空者但有名字字不可
得中道觀智亦但有字求不可得無所有性者無自

他共無因等性也一切言語道斷者不可思議也不
生者惑智理皆不生也不出者如來所治畢竟不復
發也不起者諸方便皆寂滅也無名者名不能名也
無相者相不能相也無所有者無二邊之有也無量
者非數法也無邊者無方所也無礙無障者徧一切
處也但以因緣有者結也上直明中道觀慧今明雙
照二邊理性畢竟清淨如上所說非解非惑而從惑
因緣生生歿從解因緣生涅槃又因緣有有於涅槃
從顛倒生者生於生歿此則雙照意顯也常樂觀如
是等法者卽三諦等法也又但因緣有從顛倒生者

結不思議三諦境也故說者不思議教也常樂觀者
結不思議三觀也又觀一切法空如實相標觀體不
顛倒去九句釋觀相不爲二邊入倒所動名不倒不
動不墮二乘凡夫二地故云不退不轉此二句明智
用理非未來故不生非過去故不出非現在故不起
釋論五十一云如虛空無入無出無住相攝大乘亦
爾無未來入處無過去出處無現在住處第四十三
云因邊不起名不出緣邊不起名不生凡有十九句
初一句摠後十八句對大品十八空如實相卽第一
義空不顛倒卽內空內無六入我我所不顛倒不動

卽外空外不爲六塵流動也不退者卽內外空十二
入空故故言不退不轉卽空空空破諸法諸法是所
破空是能破無復諸法唯有空在此空亦空故言空
空空旣空故無復能轉故言不轉也如虛空卽是大
空執方計破故言如虛空無所有性卽畢竟空諸法
無遺餘故名畢竟空以畢竟空故無所有性也一切
言語道斷卽一切空一切空不可說故言語道斷不
生卽有爲空有爲是因緣和合旣不合卽不生不出
卽無爲空無名出離出離法空故名不出不起卽無
始空求原初不可得故無起無名卽性空可解無相

卽相空實無所有卽不可得空無量卽有法空有法
卽有量有量旣空故言無量無邊卽無法空無法則
是邊表今空故則無邊無礙卽有法無法空二不可
得故言無礙無障卽散空妨障不可得故言無障十
八空皆是中道正慧皆名爲空隨十八種境故言十
八耳大經云如來常修十八空義故故用十八空用
釋十八句也偈有二十八行三句爲三初一行頌標
章次二十二行頌修行後五行三句明行成長行行
近別釋偈中合頌正言意同開合互現廣略之解彌
復可依上行近二文各有三今偈合頌不復次第初

應入行下十四行頌事遠近上有十種遠離頌中略
不次第在文可見亦是頌人空行處取意卽兼頌近
處三意故偈云是則名爲行處近處常離國王者比
丘親近國王有十非法一陰謀王命二王誅大臣三
典藏亡寶四宮人懷妊五王身中毒六大臣諍競七
二國交兵八王愒不施民九斂民物十多疾疫謂比
丘行呪有此十事一切臣民謂是比丘所作作此謗
比丘卽謗法亦謗佛故佛不令親近王也外道梵志
者摩墜伽經云初人名梵天造一韋陀次名白淨變
一爲四一名讚誦章也二名祭祀三名歌詠四名禳

災一一各三十二萬偈合成一百二十八萬偈有一
千七百卷也次名弗沙有二十五弟子各於一韋陀
能廣分別遂有二十五韋陀次有人名鸚鵡變一韋
陀爲十八次有人名善道有二十一弟子變爲二十
一韋陀如是展轉變爲千二百六韋陀也毗陀論此
云智論婆耶娑造凡四種一信力毗陀明事火滅罪
二耶受毗陀明供養婆羅門得福三娑摩毗陀明和
合二國四阿陀婆毗陀明鬪戰讀此四論自稱一切
智人毗伽羅此名記論婆尼尼造明種種經書并諸
雜語衛世師論優留佉造此翻最勝出世八百年明

六諦迦毗羅此翻黃頭亦云龜種造論名僧佉僧佉
此云無頂因人名論故言迦毗羅說二十五諦小乘
三藏學者佛在波羅柰最初爲五人說契經修多羅
藏佛在羅閱祇最初爲須那提說毗尼藏佛在毗舍
離獼猴池最初爲跋耆子說阿毗曇藏五百羅漢初
夜集阿毗曇藏相續解脫經此爲三藏學也深著五
欲欲相者四天下人龍須輪四天王皆根相到初利
天以風爲事炎天相近爲事兜率相牽爲事化樂天
相視爲事他化自在心念爲事上天皆離欲寡女處
女者阿難問佛如來滅後見女人云何佛言勿與相

見設見勿共語設共語當專心念佛及諸不男彼名
般吒者此翻黃門黃門者有男女形不能男女入里
乞食者雜阿含云有一羊往糞聚飽食還羣真高我
得好食比丘亦如是得四事已起染著欲想不知出
要設不得恒生想設得向諸比丘真高毀篋他人我
得彼不能得是爲羊比丘乞食師子王遇大獸卽噉
不味不著得小獸卽噉不鄙不薄比丘亦爾得四事
供養不起染著無有欲想自知出要設不得利養不
起亂念無增減心是爲師子王比丘乞食乞食行役
病四事而前後入時明入精進入懈怠乞食前作是

念爲修道補飢瘡乞雖未得不廢念行乞食得已爲
報思念道不輟前後兩時倍加精進餘三事前後亦
如是反此名八懈怠實雲經明乞食作四分一分奉
同梵行一分與句人一分施鬼神一分自食又復不
行下第二八行頌非遠非近理遠近處若有比丘下
第三五行三句明行成又三初一行半標行成事成
外儀無失理成內心無滯故云無怯弱也次菩薩有
時下第二三行行成而得安樂後一行一句頌長行
摠結菩薩入靜室下釋安樂之因因修禪定止於過
惡得人無我外則不損因修智慧離諸取著得法無

我內無顛倒是則心不怯弱不怯弱名安樂也文殊
下第三一行一句頌長行摠結也第二口安樂行亦
長行偈頌長行爲二一標章二釋行法標章如文若
口宣說下釋行法又二謂止行觀行止爲四一不說
過二不輕慢三不歎毀四不怨嫌初不樂說人經過
者人聽有過法有何過七方便法是佛隨他意語名
不了義若過其法則惱其人非安樂行相也二亦不
輕慢者不倚圓箴偏重實輕權也三不說他人長短
者初不說一切人次別舉聲聞夫人惡聞其失故不
譚短而譽對毀故不稱長亦不約張說趙長趙謂以

他長譏已短寄彼諷此亦不得向張說趙短背毀於彼亦復背毀於我爲此義故善惡俱止也又不說長短者日藏第一云初中後夜減省睡眠精進坐禪誦經修道背捨生處向涅槃路不稱他短不說已長謙下卑遜不自憍高衣食知足頭陀精進不放逸行係念思惟心不馳散於一切衆生起慈悲心又如修多羅所說空行自讀誦教人讀誦不謗他不說他過不稱已長於聲聞人又根性不定若歎二乘或令彼退大取小若毀些二乘或令其大小俱失兩無所取也四不生怨嫌心者若謂其人法妨害我道卽是怨心

謂其鄙劣卽是嫌心心機一動聲說卽發杜說過之源故不生怨嫌也善修如是下觀行門也觀諸法空無所取著心不苟執不逆人意不違法相則不說小乘法答但以大乘答者若見無大機而說小得方便益若不見無大而說小妨其大緣等是不見但說大無咎偈有十六行半爲三初二行頌標章次九行半頌前行法後五行明行成初二行頌上住安樂行上揔稱應住頌中別出行相行相者有三安隱說法者半行欲令前人得安隱道及果卽入室義清淨地等半行卽坐座義油塗身等一行卽著衣義三法導口

業名安樂行安處法座下九行半頌行爲二初五行半頌止行次四行頌觀行上止行有四今具頌初隨問爲說半行頌不輕慢慢則不隨若有比丘至隨義答二二行半頌不說長短但依義不譚人好惡若有難問隨義答者有二一可答二不可答問答相難詰相上下若勝負則自知是爲智者語自放恣敢有違者誅之是爲王者語長短是非皆不知唯覓勝而已是爲愚者語因緣譬喻去至入於佛道三一行半追頌不樂說人法過若說人過生人毒念今不說過故使發心入佛道佛道從喜生也除懶惰意四一行頌

無怨嫌怨嫌心起則懈懶憂惱今以慈心說法無怨嫌者精進無憂上長行皆約止善說頌中皆約行善也從晝夜常說無上道教去第二四行頌上觀門上云但以大乘答頌云說無上道上云今得一切種智頌云願成佛道我滅度下第二五行偈明口安樂行成初一行標行成次無嫉下第三二行明內無過則外難不生如無臭物蠅則不來次智者如是下第三一行明內有善法所以行成如我上說者若內無過如長行中說若內有善如偈中說次其人功德下第四一行格量功德如文第三意安樂行亦長行偈頌

法華文句卷九
長行亦爲三標章釋行結成釋中亦先止後觀止中
有四一不嫉諂二不輕罵三不惱亂四不諍競夫二
乘欲速出生死先除貪欲菩薩先除瞋見嫉是瞋垢
諂是見垢嫉忌違慈悲之心非化他之法諂誑乖智
慧之道非自行之法智慧被障將何上求慈悲苟妨
將何下化安樂行菩薩最須棄之亦勿輕罵下不應
以圓行呵別知機可責不知勿罵容有退善根義比
丘下不應以圓呵通其本無大機強以圓呵乖心成
惱通旣被呵圓復未解前疑後悔大小俱失去道紆
迴名甚遠此惱別行人沈空取證名不得此惱通人

厭生死名懈怠悲花明小乘者爲懈怠起大悲心去
明觀行亦爲四約前四惡而起於行善一於一切起
大悲違於嫉諂二於如來起慈父心違於輕罵凡求
佛道卽是學人敬學如佛不得輕罵諸者通三世此
卽未來如來也三於菩薩起大師想違於惱亂理論
三乘皆是菩薩有化訓德皆衆生師應起師想勿言
其短四平等說法違於諍論平等破偏執諍也不
多不少量器利鈍也文殊下結行成又二一由止惡
惡不能加故云無能惱亂二由觀行故勝人來集得
好同學也偈有六行初五行頌上止觀二行各有四

法華文句卷九
九
意後一行頌行成第四誓願安樂行有二初長行次
偈頌長行又二初明行法次歎經就行法爲三標章
行法結成標章如文行法爲三初在家出家去明標
誓願境二從應作是念去明起誓願之由三從我得
去正立誓願初明慈誓境通取曾發方便心者而未
出三界名在家斷通惑盡名出家此攝得兩種二乘
三種菩薩此輩亦具無明亦應是大悲境但其皆曾
發心與慈誓相應須與其圓道圓果之樂故言生大
慈心耳悲境者非菩薩人通取未曾發方便心者名
非菩薩全不歸向方便況復真實此悲境攝得一切

三界內者此等亦須與樂但其流轉無際正與悲誓
相應宜拔其罪因罪果故言生大悲心耳從應作是
念至隨宜說法者卽起慈之由由諸樂小執佛方便
以爲真實不會圓道故言大失大失是慈誓之由從
不聞不知去是悲誓之由由未發偏圓心不聞偏圓
二道故以不聞偏道無聞慧不知者無思慧不覺者
無修慧又無圓三慧何者不問故不聞不信故不知
不解故不修偏圓三慧權實皆無甚可憐愍起悲之
由從其人雖不問不信此經去正發誓願彼雖不問
不信偏圓二道菩薩不約偏發誓但欲與其圓道三

法華經卷第九
慧故言雖不問不信此經我得三菩提引令得入也
誓願菩提智慧神通皆約安樂行得何者深觀如來
座故得智慧力四辯莊嚴能以慧拔也深觀如來室
如來衣得大善寂力不起滅定現諸威儀神通福德
莊嚴先以定動也從文殊去是結行成爲三初摠結
無過失則是行成行云何成以其立大誓願故入如
來室行成以其知四衆失圓道故卽如來座行成以
其誓制其心不懈怠故如來衣行成三行具立故言
行成無過失者慈悲成故無瞋垢失如來衣成故無
懈怠如來座成故無諂曲也常爲比丘下第二別結

慈悲行成以慈成故攝得四衆人天供養聽法誓願
成故感佛神通諸天作護如來座成聽者歡喜所以
下第三釋誓行成三世佛尚守護況諸天耶從文殊
至是法華下第二歎經難聞又二法說譬說法說又
二一昔未曾顯說故昔不得二今日乃得譬說亦二
一不與珠譬昔未曾顯說二與珠譬譬今日得聞
二譬各有開合不與珠譬爲六一威伏諸國二小王
不順三起兵往罰四有功歡喜五隨功賞賜六而不
與珠輪王譬如來化世降伏諸國譬陰界入諸境二
小王譬煩惱等未得無漏調伏名不順其命三起種

法華文句卷九
種兵譬七賢中方法爲前軍須陀斯陀中方法爲次
軍阿那阿羅漢中方法爲後軍所破者是三毒等分
八萬四千之寇盜能破者是八萬四千法門之官兵
王見兵下第四有功歡喜隨功賞下第五隨功賞賜
者田卽三昧宅卽智慧聚落初果二果邑卽三果城
卽涅槃衣服卽慚忍善法嚴身之具助道善法也種
種七寶卽七覺等象馬車乘卽二乘盡無生智也奴
婢卽神通得有漏善法如人民唯譬中下第六而不
與珠有出分段機爲小功勳有出變易之機爲大功
勳驚怪者未有大勳忽賜髻珠諸臣皆怪譬衆生大

機未動忽說此經二乘疑惑菩薩驚怪合六譬一一
如文文殊如輪王下與珠譬又二一有大勳二與珠
明珠者明譬中道智圓譬於常在頂者極果所宗髻
中者實爲權所隱解髻卽開權與珠卽顯實合亦二
能令至於一切智智卽果名是行一也第一之說者
是教一秘藏是理一兼得人一也偈有十四行半爲
二初四行頌上行法次十行半頌上歎經初頌行法
又二初一行超頌行成上揔明行成今頌別顯常行
忍辱頌著衣行成哀愍一切頌入室行成乃能演說
頌坐座行成次後末世下第二三行頌修行法上有

法苑珠林卷九
三境由誓等偈具頌次譬如強力下第二有十行半
頌上歎法難聞上有法譬合今但頌譬合頌譬有二
初三行頌不與珠次如有勇下第二一行頌與珠次
如來亦爾下第二合譬初三行半頌合不與珠次既
知衆生下第二三行頌合與珠其中細開云我滅
度後下二十三行是品之第三摠結行成感徵之相
以勸修行爲三初一行半結勸四行次二十行半舉
三報以勸亦名三障清淨後一行摠結也三障淨轉
現生後世惡業盡卽得現生後勝報也初一行無憂
惱是報卽轉轉現報二半行不生貧窮是業卽轉轉

生報也三衆生樂見下十九行煩惱障轉轉後報也
今初讀是經一行滅現世憂惱卽除苦受之報此轉
現報心無病痛等卽轉報色也不生貧窮下第二半
行轉惡業也惡業因應感惡果經力轉惡因得好果
卽轉生報也不生卽無惡生業現在持經不作貧窮
業來世不生卑賤也衆生樂見下十九行明後報轉
轉三煩惱障也爲二初三行別明三煩惱障轉二十
六行摠明一切障轉也初又三初衆生樂見下一行
別明貪障轉多欲者則人忽慢又障生梵天欲障轉
故人所樂見天童給使也刀杖不加下第二一行半

別明瞋障轉捨瞋則除內刀箭入陣則外刃不傷智
慧光明下半行三別明愚癡障轉若於夢中夢見妙
事下第二有十六行總明一切煩惱障轉也亦是後
報轉持經現感此相當知過去久已成就今藉緣而
發耳又有成佛因果等相並是後報故於夢中見未
來後報之相百千萬劫事在一念夢中用表妙法不
可思議一中無量無量中一是相前現後當剋果又
爲六從初信心乃至妙覺八相成佛皆如來莊嚴而
自莊嚴卽忍辱報約初三行夢入十信又二初二行
半慈悲報次半行正見無癡報次又見諸佛下二六

行半夢入十住次又見自身在下三三句夢修十行
次證諸實相下四一句夢悟十迴向次深入禪定下
五半行夢入十地次諸佛身金下六五行夢入妙覺
旣云證不退智卽爲授記者當知得入初住無生得
記之位也又見自身在山林知是十行修習善法也
證諸實相知是十迴向正觀中道位也深入禪定卽
第十地中無垢三昧入金剛定諸佛皆現摩頂受職
也夢八相佛以知妙覺此中或是初住能八相成佛
之相仍前次位寄譚極覺耳若後惡世一行摠結行
成也信根者於三寶得堅固信一切不能沮壞精進

法華經卷第九
根者得四正勤念根得四念處觀勤方便調伏貪憂
定根得四禪慧根是解四諦如實知也又信根於如
來發菩提心所得淨信心精進根於如來所發心所
起精進念根於如來發心所起念定根於如來所起
三昧慧根於如來所起智慧入正是沙門道亦是沙
門法成就貪瞋一切煩惱盡是沙門義四果是沙門
果夢者從須陀洹至支佛悉有夢唯佛不夢無疑無
習氣故不夢從五事故有夢如偈說以疑心分別學
習因現事非人來相語因此五事夢又是所更聞見
及諸患為七事故有夢現在意識尚不見色云何夢

中意地見色答皆是曾見曾聞故想耳又是吉不吉
相耳夢中無通無宿命智云何能見未來世事答此
非願智境界乃是比知諸人曾有如是夢如是果今
以比知耳問誰眠答五道及中陰皆有眠在胎諸根
具者亦是眠乃至佛亦眠問眠是愚是蓋此云何通
答佛起現前欲調身故眠非蓋非愚眠也

釋從地踊出品

師嚴道尊鞠躬祇奉如來一命四方奔踊故言從地
踊出品三世化導惠利無疆一月萬影孰能思量召
過以示現弘經以益當故言從地踊出品虛空湛然

無早無晚或者執迹而闇其本召昔示今破近顯遠
故言從地踊出品寂場少父寂光老兒示其藥力咸
令得知故言從地踊出品文云是從何所來以何因
緣集今以諸義釋品顯四悉檀因緣之解故言從地
踊出品此下是大段第二開師門之迹顯佛地之
遠本其文爲三一從此下至汝等自當因是得聞序
段也二從爾時釋迦告彌勒下至分別功德品彌勒
說十九行偈正說段也三從偈後下十一品半流通
段云序文爲二一踊出二疑問踊出爲三一他方
菩薩請弘經二如來不許三下方踊出他方菩薩聞

通經福大咸欲發願住此弘宣故請爲之如來止之
凡有三義汝等各各自有已任若住此土廢彼利益
一又他方此土結緣事淺雖欲宣授必無巨益二又
若許之則不得召下下若不來迹不得破遠不得顯
是爲三義如來止之召下方來亦有三義是我弟子
應弘我法以緣深廣能徧此土益徧分身土益徧他
方土益又得開近顯遠是故止彼而召下也從佛說
是特下是第三下方踊出爲二一經家敘相二明問
訊兩段各五初五者一踊出二身相三住處四聞命
五眷屬住處者常寂光土也常卽常德寂卽樂德光

法華經卷第九
卽淨我是爲四德秘密之藏是其住處以不住法住
秘藏中下方者法性之淵底玄宗之極地故言下方
在下不屬此空中不屬彼非此非彼卽中道也出此
不在上不在此下不上不下住在空中亦是中道也
來之由者聞命故來弘法故來破執故來顯本故來
皆如上說所將眷屬者若人情往望謂領六萬五萬
恒沙者爲多領三二一者爲少單已者隻獨若依文
往尋六萬五萬者爲少單已者爲多文云單已獨處
者其數轉過上若依法門者一一皆是導師德能引
衆人至於寶所當知一已非獨六萬非多一卽一道

清淨二卽定慧三卽戒定慧四卽四諦五卽五眼六
卽六度一一度具十法界一一界各有十十卽有百
百卽具千十善卽有萬一度具萬六度卽六萬法門
多不爲多一不爲少非多非少而多而少云云是諸
菩薩從地出下第二問訊爲五一三業供養二陳問
訊之辭三佛荅安樂四偈頌隨喜五如來述歎就初
三業供養經五十小劫謂如半日四衆徧見此乃隱
長而現短借其神力令狹而見廣俱是不可思議也
拜遶是身讚法是口瞻仰是意五十小劫與半日者
此是時節不可思議如來所見不以二相下方菩薩

法華文句卷第五
十七
常面稱揚如來默然常受其讚解者卽短而長謂五十小劫惑者卽長而短謂如半日斯爲本迹而作弄引如來未說闇本而執迹佛若開顯悟近而達遠亦知不思議一也四衆徧見菩薩者亦是不思議也夫肉眼天眼所見不遠而今所覩充滿虛空見雨猛知龍大見花盛知池深見應滿虛空則知真彌法界也初標四導師次陳問辭問又二長行偈頌長行有二一問如來安樂二問衆生易度云但舉四人者欲擬開示悟入四十位耳如華嚴但舉法慧德林金幢金藏說四十位云三如來具答安樂易度兩事相

成易度則安樂安樂則易度易度爲兩一根利德厚世世已來常受大化始見我身卽稟華嚴入如來慧果熟易零是衆生易度二根鈍德薄世世已來不受大化爲是人故須開頓說漸三藏方等般若而調伏之亦令此人今聞法華入於佛慧比前雖難於佛甚易佛識其宜方便得所薄須塗慰慧悟是同今略舉十意釋之第一始見今見第二開合不開合第三豎廣橫略第四本一迹多迹共本獨第五加說不加說第六變土不變土第七多處不多處第八斥奪不斥奪第九直顯實開權顯實第十利根初熟鈍根後熟

法華文句卷九上
第一始見今見者初成道時名始見法華座席久後
真實名今見也日照高山卽說於頓不開不合爲不
入者開頓說漸五味調伏令漸歸頓頓直豎入入於
法界故言豎廣不歷方便故言橫略今歷五味卽是
橫廣得入佛慧亦是豎廣一臺故本一千葉故迹多
迹與衆經同故言共本與衆經異故言獨加四菩薩
說四十位自說開示悟入不加於他花王世界故言
不變三變土田故言變土七處八會是爲多處者闍
崛山遠處虛空故不多處滅化城改客作故言斥奪
無如此事故不斥奪行大直道名直顯實決了聲聞

法名開權顯實根利緣熟始入佛慧根鈍後熟今入
佛慧緣宜不同略爲十異種智法界等無差別故文
云始見我身聞我所說卽皆信受入如來慧除先修
習學小乘者今於此經入於佛慧明文在茲不須疑
也諸師見其緣異逐緣異解迷不知反去道轉遠若
識理同千車共轍佛慧則無殊也舊云華嚴了義滿
字常住法華不了義非滿非常今以此文並之若始
入是了義今入不了義者始入是佛慧今入非佛慧
若佛慧旣齊了義亦等滿字常住悉然云地人呼
華嚴爲圓宗法華爲不真宗今亦用此文並之第四

菩薩領解隨喜能問者卽是華嚴中四大士法華中
身子三請俱是能問也所問者卽是問佛智慧也第
五如來述歎者與問頌異問家隨喜能問人皆是菩
薩及所化人聞已信行我等隨喜如來述歎能化人
生隨喜者此義云何然能問者皆是古佛汝能隨喜
卽是如來菩薩隨喜其迹如來述歎其本此亦密表
壽量云爾時彌勒及八萬大士下第二疑問序自
寂場已降今座已往十方大士來會不絕雖不可限
我以補處智力悉見悉知而於此衆不識一人然我
遊化十方覲奉諸佛諸佛大衆快所諳知就履歷之

處亦所不識若來若去如是推之皆所不識又彼諸
大士是前進先達彌勒是後畚末學後不知前故所
不識又彼等大士本實相底應現十方別頭教化所
有真應非彌勒境界是故不識又佛託弘經召諸大
士大士聞師命故來密聞壽量非時衆所知故言不
識此約四悉檀釋疑問序也云疑問爲二一此土
菩薩疑二他土菩薩疑此土疑又二初長行疑念次
偈十九行半偈正問又爲五初一行一句問何處來
次何因緣下第二一行三句問何因緣來次一一諸
菩薩下第三九行敘其數量次是諸大威德下第四

法華文句卷第六
兩行問其師誰次如是菩薩神通下第五五行半結
請又五初兩句結歎次四方地下第二兩行請答來
處次我於此衆下第三一行請答來緣次今此之大
衆下第四一行半大會同請次無量德下第五二句
請答師主云云二他方菩薩疑者分身眷屬橫在十
方與彌勒同疑二土俱不知本地欲顯成道甚久各
各陳疑已佛佛皆抑待彌勒云云○爾時釋迦牟尼
佛告彌勒下第二正說文爲二先長行次偈頌誠許
後正說長行先述讚次誠誠勿亂勿怠勿退次許標
果智果智者如來知見知見妙果也次開化教者宣

示也自在神力者過去益物也師子奮迅者現在十
方分身所被之處也或云奮迅將前之狀也此表未
來常住益物之相也大勢威猛者未來益物也或以
此爲現在震動十方隨人意用耳幸依文次第者好
又私謂如來自在者我也神通者樂也師子奮迅奮
迅除垢淨也大勢威猛未來益物卽常也此點四德
意也云云四行偈初三句頌三誠後三行一句頌許
初一句頌標智慧果次三行頌三世爾時世尊下第
二卽正說段也文爲三此去盡壽量品正開近顯遠
二分別品初揔授法身記三彌勒揔申領解初又二

先略開近顯遠動執生疑次廣開近顯遠斷惑生信
略又二一略開二因疑更請就略開有長行偈頌此
中但答二問不答何因緣集由不答故所以重請長
行雙答雙釋如文釋下方空中住者釋論明有底散
三昧應作四說有者三有也底者非想想也以
深勝故爲底又有者名相也底者空也以空寂故爲
底又有者二邊俗也底者邊際智滿故爲底今經以
下方空爲底不是上界不是下界表中道爲底此是
約教分別云於諸經典下釋也師知弟子備智斷
兩德初是雙修智斷次雙證智斷於經典分別是修

智正憶念是修斷不樂在衆是證斷勤行精進是證
智從不依止人天而住是釋處也人天是二邊不住
不著也深智無礙者依不思議智也樂於佛法者樂
不思議境也境智甚微非近行菩薩也偈八行半初
五行半頌答兩問下三行頌雙釋云爾時彌勒下
因疑更請有長行偈頌長行爲二一疑二請聞上菩
提樹下乃教化之今皆住不退又聞我從久遠來教
化是等衆聞此二說動執生疑白佛下騰疑更請又
二一法二譬法說爲三初卽白佛下一疑成道近所
化甚多執近而疑遠也次世尊此大菩薩下第二所

化既多行位深妙執遠而疑近也次世尊如此之事
下第三結請譬說有開合開爲三色美髮黑譬上成
道近意也指百歲人去譬上所化甚多意也淮北諸
師以譬釋譬父服還年藥貌同二十五子不服藥形
如百歲若知藥力不疑子父不知者恠之如來橫服
垂迹之藥示伽耶始生諸菩薩直論本地久發道心
今住不退若佛及佛快知此事自下不達不得不疑
是事難信下結譬也初合近譬如文從而此大眾下
合遠譬觀此菩薩久種善根非止伽耶發心善入出
住者九次第定是善入師子奮迅是善出超越是善

住通藏意也從初地至十地名善入十地入重玄門
倒修凡夫事名善出妙覺徧滿名善住別意也畢法
性三昧名善入首楞嚴名善出王三昧名善住圓意
也次第習諸善法據因爲善習就果爲善入

云云善

答難問者具二莊嚴也七方便之尊故云實也今日
世尊下請答也又三從今日下舉佛語從我等下第
二明請意請意爲二一爲現在我雖未達信而已矣
然諸菩薩下第二爲未來淺行喜生誹謗新發意者
謗墮惡道不退者雖信不謗不能增道若爲分別謗
者則生信信者則增道

云云從唯然下第三請答請

答亦二初除我等疑及未來下第二除未來疑偈十
四行頌上法譬五行頌法說九行頌譬說法說中三
初一行頌執近次此諸佛子下第二二行三句頌疑
遠後云何而可下第三一行一句頌結請頌譬中初
二行頌開譬後世尊亦如是下七行頌合譬亦三就
初二句頌合近次是諸菩薩等志下第二三行半頌
合遠後我等從佛聞下第三三行頌合請答 云云

密開壽量品

開未暇考定此字心
實有所疑故記諸此
幸考定者正之

妙法蓮華經文句卷第九上

妙法蓮華經文句卷第九下

天台 智者 大師說

○釋壽量品

先出異解叅師序云壽無量劫未足以明其久分身
無數不足以異其體然則壽量定其非數分身明其
不異普賢顯其無成多寶明其不滅耳河西道朗云
明法身真化不異存沒理一多寶現明法身常存壽
量明與太虛齊量道場觀云會三歸一乘之始也滅
影澄神乘之終也滅影謂息迹澄神則明本故迹無
常而本常也注者云非存亡之數曰壽出修夭之限

稱量法身非形年所攝使大士修踐極之照不以伽
耶爲成佛百年爲期願也竺道生云其色身佛者應
現而有無有實形旣形不實豈有壽哉然則萬形同
致古今爲一古亦今也今亦古也無時不有無處不
在若有時不有有處不在者於衆生然耳佛不爾也
是以極譚長壽云伽耶是也伽耶是者非復伽耶伽
耶旣非彼長何獨是乎長短斯亡長短恒存焉前代
匠者如向所說多約無量明常近世人師多云壽是
量法前過恒沙後倍上數終歸限極而明無常又惑
者執品明壽量量是無常那作常解今爲答之品直

道壽量不道壽有量不道壽無量爾作無常他作常
解此復何咎鷓蚌相扼我乘其弊應具四解謂實有
量而言無量彌陀是也實無量而言量如此品及金
光明是也實無量而言無量如涅槃云唯佛與佛其
壽無量是也實有量而言量如八十唱滅是也品文
具有此義豈可是一而非三耶問若壽量明常與涅
槃何異今反質之法華一乘與勝鬘一乘何異云云
若分別答者法華略明常涅槃廣明常勝鬘爲一明
一法華會三明一云云問近成是方便遠成是真實
者華嚴寂滅道場大經超前九劫皆成方便若爾法

法華文句卷九
華開遠竟常不輕那更近當知法華已復方便若爾
會三歸一竟亦應不會三歸一若爾開三顯一諸佛
道同開近顯遠亦諸佛道同若爾諸佛皆爾非獨釋
迦若獨釋迦前諸義壞答云是我方便諸佛亦然又
諸菩薩聞壽量發願願我於未來說壽亦如是此卽
諸佛道同亦不偏言一近一遠故知寄無始無終無
近無遠顯法身常住有始有終有近有遠論其應迹
用此義望諸經對緣雖異終不異也旣了衆經諸師
不可師也問義推常可然徵文何據答明者賢其理
暗者守其文但尋詮會宗是教之正意苟執糟糠問

橋何益又教本爲緣緣異說異或隨欣隨宜隨治隨
悟悟則達到已矣那更盤桓阡陌何爲故云泥洹真
法寶衆生種種門入此之謂也又文有多少涅槃以
未來常住爲宗其文則多不以過去久成爲宗其文
則少若隨多棄少則是魔說非佛說也此經以過去
久成爲宗點塵數界其文則多未來常住其文則少
若從多棄少頭破作七分如阿梨樹枝譬天子敕若
多若少俱不可違違之得罪方便品云世間相常住
於道場知已導師方便說此文卽未來常住不滅又
云我常住於此又云常在靈鷲山及餘諸住處普賢

法華文句卷之九
觀云常波羅蜜所攝成處我波羅蜜所安立處如此
常文亦復不少又此經處處明法身法身豈不常耶
問既明法身應論三德答權實二智豈非般若三世
示現豈非解脫實相本地卽是法身三德明文爲若
此也釋品如來者十方三世諸佛二佛三佛本佛迹
佛之通號也壽量者詮量也詮量十方三世二佛三
佛本佛迹佛之功德也今正詮量本地三佛功德故
言如來壽量品如來義甚多且明二三如來餘例可
解二如來者成論云乘如實道來成正覺故名如來
乘是法如如智實是法如如境道是因覺是果若單

論乘者如如無所知單明實者如如無能知境智和
合則有因果照境未窮名因盡源爲果道覺義成卽
是乘如實道來成正覺此真身如來也以如實智乘
如實道來生三有示成正覺者卽應身如來也三如
來者大論云如法相解如法相說故名如來如者法
如如境非因非果有佛無佛性相常然徧一切處而
無有異爲如不動而至爲來指此爲法身如來也法
如如智乘於如如真實之道來成妙覺智稱如理從
理名如從智名來卽報身如來故論云如法相解故
名如來也以如如境智合故卽能處處示成正覺水

法華文句卷九下
四
銀和真金能塗諸色像功德和法身處處應現往八
相成道轉妙法輪卽應身如來故論云如法相說故
名如來也法身如來名毗盧遮那此翻徧一切處報
身如來名盧舍那此翻淨滿應身如來名釋迦文此
翻度沃焦是三如來若單取者則不可也大經云法
身亦非般若亦非解脫亦非三法具足稱秘密藏名
大涅槃不可一異縱橫並別圓覽三法稱假名如來
也梵網經結成華嚴教華臺爲本華葉爲末別爲一
緣作如此說而本末不得相離像法決疑經結成涅
槃文云或見釋迦爲毗盧遮那或爲盧舍那蓋前緣

異見非佛三也普賢觀結成法華文云釋迦牟尼名
毗盧遮那乃是異名非別體也揔衆經之意當知三
佛非一異明矣問此品無三佛名那作此釋答雖不
標名而具其義文云非如非異非如三界見於三界
此非偏如顯於圓如卽法身如來義也又云如來如
實知見三界之相卽是如如智稱如如境一切種智
知見卽佛眼此是報身如來義也又云或示已身已
事或示他身他事此卽應身如來義也若但性德三
如來者是橫但修德三如來者是縱先法次報後應
亦是縱今經圓說不縱不橫三如來也揀縱橫如來

尚非今義況三藏通教如來耶又法華之前亦明圓
如來者同是迹中所說耳發迹顯本三如來者永異
諸經論云示現成大菩提無上故示三種菩提一應
化菩提隨所應現卽爲示現如經出釋氏宮故二報
佛菩提十地滿足得常涅槃如經我實成佛已來無
量無邊劫故三法佛菩提謂如來藏性淨涅槃不變
如經如來如實知見三界之相故經具其義論出其
名不作上釋寧會經論耶次明壽量者壽者受義真
如不隔諸法故名爲受又境智相應故名受又一期
報得百年不斷故名受量者詮量也量字則通無的

別據詮量法如來以如理爲命報如來以智慧爲命
應如來同緣理爲命詮量諸命若有量若無量若非
量非無量法身如來如理命者有佛無佛性相常然
不論相應與不相續亦無有量及無量文云非如非
異非虛非實蓋是詮量法身如理命也詮量報身如
來以如如智契如如境境發智爲報智冥境爲受境
旣無量無邊常住不滅智亦如是函大蓋大文云我
智力如是久修業所得慧光照無量壽命無數劫此
是詮量報身如來智慧命也詮量應身者應身同緣
緣長同長緣促同促云云自彼於我何爲文云數數

法華文句卷九
六
現生數數現滅或復自說名字不同年紀大小此是
詮量應佛同緣命也復次法身非量非無量報身金
剛前有量金剛後無量應身隨緣則有量應用不斷
則無量通途詮量三句在聖一句屬凡有量無常都
非佛義舊來所說乃是增減兩謗加誣於佛非魔是
何四句詮量其義已顯爲未解者更常等四句料簡
先別作次通作別者非常非無常雙非理極卽法身
也常者卽報身也報智境合亦非常非無常但取正
智圓滿不生不滅過金剛心之前故取常爲報身耳
亦常亦無常應身也應用無盡爲亦常數唱涅槃名

亦無常無常者金剛心已前智用增進乃至凡夫生
滅出沒皆是無常三佛各一句凡夫共一句此約別
教別分別也通途圓說者一一如來悉備四句法身
四者非常非無常雙破凡聖八倒故常者如虛空常
故無常者無凡夫生滅倒故亦常亦無常者寂而雙
照故報身四者非常非無常者智冥境故常者出過
二乘故無常者無生滅倒故亦常亦無常能雙照故
應身四者非常非無常者非報非生滅故常者常應
同故無常者同無常故亦常亦無常者兩存故凡夫
旣得無常一句通途亦作四句但有性德之理尚無

法華文句卷之六
四句名字況行用耶可以意得不俟說也一身卽是
三身不一不異當知一佛身卽具諸身壽命功德隨
緣感見長短不同大經云凡夫二乘見佛壽命猶如
冬日菩薩所見猶如春日唯佛見佛壽命無量猶如
夏日所以然者凡夫博地翳障朦朧藏通二乘雖斷
四住不見中道若捨分段受法性身未破無明彼土
所奉猶是勝應當知二乘祇見冬日若諸菩薩未登
地住所見同前若破無明乃至受分法身與而爲語
得見報身壽命奪而爲語猶是勝應未窮報身之源
未盡法性之極所見佛壽命猶是春日唯佛與佛窮性

盡源見法身壽命猶如夏日大經舉三譬譬之於諸常
中虛空第一一切壽命如來第一此譬法身壽命無
始無終性相凝湛不同應報也二譬如四河皆歸大
海此譬報身所修萬善皆感佛報壽命海中也三阿
耨達池出四大河此譬應身壽命從法報出同他長
短也此品詮量通明三身若從別意正在報身何以
故義便文會義便者報身智慧上冥下契三身宛足
故言義便文會者我成佛已來甚大久遠故能三世
利益衆生所成卽法身能成卽報身法報合故能益
物故言文會以此推之正意是論報身佛功德也復

法華文句卷九
次如是三身種種功德悉是本時道場樹下先久成就名之爲本中間今日寂滅道場所成就者名之爲迹諸經所說本迹者卽寂滅道場所成法報爲本從本所起勝劣兩應爲迹今經所明取寂場及中間所成三身皆名爲迹取本昔道場所成三身名之爲本故與諸經爲異也非本無以垂迹非迹無以顯本本迹雖殊不思議一也肇師之言意在寂場之本耳復次寂場本迹復有種種或以涅槃爲本從真起應爲迹迹本俱空言思雙斷故不思議一也或以俗爲本從俗起應爲迹迹本深廣下地不能言思邊涯故言

不可思議一也或以中爲本從中起應爲迹迹本皆言語道斷心行處滅故云不思議一也復次此三非三亦復非一非三非一爲本而三而一爲迹皆言語道斷心行處滅不思議一也未知諸師指何處本迹不思議一也今攝襲四番皆是迹中不思議一耳遠指本地三番四番不可思議以爲其本從箇本而垂迹將箇迹而顯本本迹雖殊不思議一如此本迹何得不異衆經何得不異諸師問諸經各說位行或多或少華嚴四十一位瓔珞五十二位名義皆廣此經始末都無此事云何言異答譬如世人修種種業集

法華文句卷之九
種種寶求種種位若無壽命用財位爲大經云譬如
長者生育一子相師占之有短壽相不任紹繼父母
知已忽之如草法門亦爾行種種因獲種種果現種
種通化種種衆說種種法度種種人總在如來壽命
海中海中之要法性智應喉襟目莫非異是何廣開
近顯遠文爲二先誠信次正答佛旨論誠衆受爲信
此文有三誠三請重請重誠迹門三請一誠此中四
請四誠前後合五誠七請奇特大事殷勤鄭重也誠
是忠誠諦是審實不欺於物言則詣真昔七方便隨
他意語非告誠實今隨自意語示之以要故言誠諦

菩薩旣奉誠誠不敢致疑聞必取信信受誠言也正
答有長行偈頌長行爲二法說譬說法說爲二一三
世益物二揔結不虛近情唯見現在八十不知過去
無央未來不滅故約三世開近顯遠如此利益非獨
我然諸佛亦爾故揔結不虛也法說中未來語少譬
說偈中文多云過去益物文爲二一從如來秘密
下出執近之情二從然善男子下破近顯遠初又三
一出所迷法二出能迷衆三出迷遠之謂秘密者一
身卽三身名爲祕三身卽一身名爲密又昔所不說
名爲祕唯佛自知名爲密神通之力者三身之用也

法華文句卷九下
神是天然不動之理卽法性身也通是無壅不思議
慧卽報身也力是幹用自在卽應身也佛於三世等
有三身於諸教中祕之不傳故一切世間天人脩羅
謂今佛始於道樹得此三身故執近以疑遠此本說
中不復言及二乘但對菩薩菩薩攝在天人脩羅三
善道內餘三惡趣罪重根鈍少智不知作此謂也故
大品但云摩訶衍勝出天人阿脩羅亦不言三途也
菩薩有三種下方他方舊住下方卽本日所化故無
執近之謂他方舊住俱有二種一從法身應生者往
世先得無生或已先聞發迹顯本設未得聞報盡受

方便非實說也故名拂疑或有人云方便說然燈佛
是我之師然實是釋迦現作非生現生非滅現滅故
言又復言其涅槃今謂不爾但取前釋何者然燈佛
于時緣熟以佛像化之我緣未熟但爲菩薩從佛得
記得記卽是果義行行卽是因消文自足言其者卽
是中間施化之其耳非謂然燈也又中間益物卽有
形聲兩益若言值然燈佛者此有形益又復言其入
於涅槃者彼佛滅後助佛揚化卽有聲益若爾形聲
兩益皆屬中間因耳既有形聲之生生必有死死卽
入涅槃名此爲果耳不得言中間已成佛果何者法

法華經卷之二
華之前未說成佛何得有佛果之疑舊以然燈是我
現作此亦非解法華前經未論昔已成佛何教說然
燈是我所現而拂此疑耶若有衆生來至我所下第
三正明益物所宜又爲二一感應二施化至我所者
卽是過去衆生漸頓兩機冥扣法身也佛眼觀者卽
是久已成佛用佛眼鑑照無有遺差將欲起於劣勝
兩應而利益之善機凡有二力一感人天花報二感
佛道果報若以法眼觀知萬善緣其重輕各得花報
不能究竟知其終得種智果報若以佛眼圓照萬善
知其始末此經一向明佛眼觀知衆生萬善究竟得

法性身於法身地自應得聞長遠之說是故應生菩
薩多無執近之謂二者今生始得無生忍及未得者
咸有此謂也然善男子我實成佛已來下第二明破
執遣迷以顯久遠之本上文誠諦之誠卽是此也就
此復二一顯遠二從自從是來下明過去益物所宜
就初又二一法說顯遠二舉譬格量法說成佛已來
甚大久遠伽耶近謂卽破破近顯遠略有十意如玄
義云云此文正用破近顯遠破近謂情廢近顯遠廢
於近教也譬中爲三一舉譬問二答三合顯出長遠
餘經或明數不可說塵沙等爲喻方此此則爲多直

法華文句卷之十一
下塵被點之界已不可說況不下塵寧當可說下塵
不下塵界尚不可說下塵不下塵塵豈可說耶況復
過是寧可說耶彌勒等下第二答中舉三人不知也
合譬如文從自從是來下明益物所宜又三一益物
處二拂迹上疑三從若有衆生來至我所下正明益
物所宜須顯處者上引譬甚久久居何處故云常在
此土及於他國而作佛事如文於是中間下拂執迹
上之疑疑因疑果昔教所說處處行因又處處得記
卽是果疑今拂除此疑指然燈佛者卽拂因疑又復
言其入於涅槃卽拂果疑如此因果非復一條皆我

佛一大事出世之正意也信等諸根者信等五根也
慧根卽了因餘根卽緣因此二善根各有利鈍通攝
頓漸機緣頓機利鈍卽是圓別根機漸機利鈍卽是
藏通機緣又小乘根名鈍大乘根名利又小乘根名
利人天乘名鈍十法界衆生所有善根利鈍爲機不
用惡法惡法非緣了二因也如來悉照十界善機隨
所應度而現形聲饒益也從處處自說下正明應化
所宜又二先形聲益次得益歡喜先形益又二先明
非生現生次非滅現滅自說名字不同者形旣其現
則有名字因名召體機有優劣形有勝負形異故名

則不同年紀大小者卽形勝負勝者卽勝應負者卽劣應也名不同者卽二佛現壽有量無量也處處者豎論則過去之處處行因國土也橫論卽十方國土也名字不同約豎處所亦有生法名字不同如今之應身望過去然燈佛等約橫國土亦有生法名字如今之望分身亦如華嚴十號中所列釋迦異名若干不同又諸經所辯佛有三身名字不同所召法體皆異或說毗那或舍那或釋迦法身佛或名如如實相第一義般若楞嚴等比也此約示現佛法界身名字不同若現九法界身名字不同則無量無邊可以意

得年紀大小者此明壽命長短逐上所現應身或說壽二萬如迦葉佛時或說壽八萬時如彌勒佛時傳互明大小縱橫可知就法報應佛壽命大小如玄義

云或三身相望辯大小或三身各別皆爲小合說

名爲大例三點

云

此皆隨所應度爲其現身及命

長短耳亦復現言當入涅槃者應以滅度而得度者卽現滅度也令其戀仰而得解脫此義現下譬說中也又以種種方便說微妙法者是現聲益也小身短壽卽是說於漸教故言種種方便也大身長壽卽是說頓教故言說微妙法雖初以漸終令入大故言皆

法華經卷之九
令得歡喜仍此歡喜卽是施化得益佛依四悉檀施
形聲兩益衆生獲於四利稱機則喜乖機則惱下文
云皆實不虛卽此義也從諸善男子如來見諸衆生
下是現在師子奮迅益物此三昧有十功德一分別
他人諸根熟不熟清淨不清淨二以如來法輪教未
度者悉入法律三弘誓徧滿十方音聲亦爾或一音
徧滿百千萬音皆亦徧滿普教衆類四轉無上輪化
衆生皆取滅度餘人不能轉獨佛能轉五能示出家
剃髮持淨戒亦能使人樂六性行合空七放光示滅
或存或亾或示相好或隱相好八降伏四魔九令他

得入至要增長止觀十具上十善之本身三口四等

云

云

此文爲二一明機感二明應化如來見者卽佛

眼照也諸衆生樂小法者所見之機也華嚴云大衆
雖清淨其餘樂小法者或生疑悔長夜衰惱愍此故
默偈云其餘不久行智慧未明了依識不依智聞已
生憂悔彼將墜惡道念此故不說按彼經無聲聞二
乘但指不久行者爲樂小法人耳師云樂小者非小
乘人也乃是樂近說者爲小耳今當通說之所謂貪
愛二十五有卽人天之機來至我所名小法也貪樂
涅槃求自解脫卽二乘之機來至我所亦名樂小法

也樂於漸次紆迴佛道卽三菩薩機來至我所亦名樂小法也德薄者緣了二善功用微劣下文云諸子幼稚也垢重者見思未除也問非生現生備施頓漸二化七方便等可是樂小法者圓頓赴機是應樂大法者云何通判爲樂小法耶答向略其意今廣釋凡爲四義一約往日雖發大心不能專精多著弊欲不得出世名弊欲爲小法也二約現在如佛未出世諸天人等雖有大機而心染世樂著於邪見故名樂小法此二義與下譬宛轉于地意同也三約修行雖不樂於三界弊欲小法而樂三乘灰斷亦名小法雖不

樂於三乘近果而樂歷別修於一乘不能於一心圓頓普修故名樂小此三意約因門明樂小法也四約果門樂聞近成之小出釋氏宮始得菩提不欲樂聞長遠大久之道故言樂小此等小心非始今日若先樂大佛卽不說始成說始成者皆爲樂小法者耳爲是人說下第二現在應化又二一非生現生二非滅現滅現生又二一現生二利益現生又二一現生二非生現生者迹現於生非生者非始爾生也爲是人說我始得菩提前明利鈍二機來感法身今卽現勝劣兩應劣應鈍根勝應利根此兩應並有生法

法華文句卷九
二身生劣應二身生者以正慧託胎出生行七步如迦旃延子所述乃至六年苦行已還是名生身生也法身生者卽三十四心斷結習盡所得五分法身是也勝應生身生者如華嚴大經等說與諸菩薩處摩耶胎常說大乘出行十方各各七步是名生身生法身生者於寂滅道場金剛後心斷無明盡得妙覺相應慧窮照法性萬德種智圓明普備是名法身生出家者劣應出分段家勝應出二身家得菩提者劣應得有作四諦所發無漏盡無生智名爲菩提勝應卽照三諦一實之道一切種智爲菩提也然我實成下

明本實不生但天人修羅見此二種生法二身謂言始生此則不然然我久已得此生法二身今日之生非實生也故云久遠若斯若斯者如上譬之長久也但以方便下明旣非實生何故現生爲利樂小法人德薄垢重者使得佛道故言但以方便教化衆生作如是說者非生而現生故云作如是說也餘經破劣應生身生非生尚不破劣應法身生非生今經正破勝應法身生非生何者我實成佛已來久遠若斯故知今日劣勝兩法身生皆被破故生非生與餘經永異也如來所演下第二明現生形聲益先明形聲次

明不虛說卽聲教示卽形規形聲不出自他若說法身是說已身若說應身是說他身益言值然燈佛卽是說已身然燈是我師是說他身示正報是自己事示現依報是示他事隨他意語是說他身隨自意語是說已身示已他事亦類如此諸所言說皆實不虛者又二先明不虛次釋不虛初偏據聲益不虛釋則雙釋不虛初不虛者漸頓二機稟此二種形聲皆益不虛上過去章明皆歡喜似如世界之益今明皆不虛勝劣形聲逗於二機獲四悉檀皆不虛也大論明四悉檀並實世界故實對治爲人故實篤而爲論三

是世間實此實則虛緣中亦有世間三實第一義則虛若以此虛實約迹本二門漸頓益者虛實昔方便行未得實道之益是其因虛執於近迹未得本地真實之益卽是果虛今聞迹門之說同入實相卽得因中實益聞本門之說卽除執近之情得於長遠果地之實益今得二實對昔二虛約圓頓衆生於迹本二門一實一虛得中道之行是得因中之實益而執近果是於果虛今聞說因更不別得真實之益聞說遠果卽得實果之益昔有一虛今得一實故云皆實不虛也問今昔大乘所顯實相前後悟者應有異耶答

初入次入乃至壞草庵通入中道但入有漸頓故分
二教例入真諦鈍者依析法無常等觀利者用體法
空觀故分藏通耳從所以者何如來如實知見下第
二揔釋益物不虛先釋形益後釋言益不虛此中六
句顯於應身不離法身法身無形亦無起滅衆生有
起滅之機感於法身如來願力應同起滅起滅之見
出自衆生故約三界以明諸句又爲二一照理不虛
二從以諸衆生下明稱機不虛達理稱機設教化物
必不虛也如實知見卽是實智如理而照三界之實
實則無三界之因相也無有生歿者無有二歿之苦

也起集名退無常果現名出也亦無在生死之世及
入涅槃之滅此二俱滅故云亦無在世及滅度者非
於滅度之實非於生死之虛故云非實非虛也非於
世間之隔異非於出世之真如故云非如非異此四
明中道也若雙非二邊結句定一邊例如非生非死
結句爲生是生是死結句爲死是退是出結句爲退
非退非出結句爲出非虛非實結句爲實是虛是實
結句爲虛如此之流今皆非之乃至單複具足亦非
之方顯中道意耳不如三界見於三界者不如二種
三界衆生所見三界之相唯佛一人如實窮照三界

之實內具實智之用亦是隨自意語亦是或說已身
之事故大品云第一義中無所分別也如來權智如
量知見三界之相卽如三界衆生之見如實知見無
二歟而隨他意示二歟身說有二歟無退無出而隨
他意說有退有出亦無在世及滅度者而隨他意示
生世間示入涅槃說有在世有得滅者無實而說涅
槃之實無虛而說三界之虛無三世之異而說有異
無真諦之如而說有如同於三界見於三界皆是隨
他意語名爲或說他身事示他身事如來二智明審
二諦所以形言兩益皆實不虛也以諸衆生下第二

釋稱機不虛先明機感次論施化以諸衆生根機利
鈍漸頓不同性欲行智種種差別欲令各得增諸善
根故說已他之教不虛因緣譬喻也漸頓根性各有
種種此須用爲人悉檀爲人悉檀正爲生諸善根善
根猶是性習欲成性今何故先性後欲釋云因有本
日根性能起今日之欲樂如因煩惱故有五陰復因
五陰更有煩惱不前不後性欲亦爾要因習欲而成
性也欲者漸頓二機若種種欲樂不同此須用世界
悉檀也行者起作業行隨樂欲而修諸行也此須用
爲人悉檀也行中好多愛著致有妨障此須對治悉

檀愼想者是智慧卽相似解由修行故能得解生此
是方便猶未稱理無言說道猶是念想之觀漸頓衆
生居在內外凡位有諸善根欲樂欲樂故修行修行
故得似解此須用第一義悉檀隨其所得憶想之解
更爲說法卽得朗悟第一義乃至初地欲樂修行二
地時亦憶想二地之境卽是念想若發生二地真解
卽是念想觀除言語法滅乃至佛方得究竟離於憶
想獲常寂照耳欲令生下第二正對機施已他聲益
於漸頓種種根機令生種種善根故現若干已他身
事若干自他聲教若干因緣譬喻若對漸機以三藏

中四門若干因緣譬喻於一一門中復有若干如爲
懈怠者說苦忍爲我慢者說無常忍等通教四門亦
如是若對頓機如別圓等亦各四門若干種種如三
十二菩薩各說入不二法門華嚴中種種行類相貌
皆爲種種根機施若干譬喻言辭說法也所作佛事
未曾暫廢者揔結不虛如上若干已他形聲皆令衆
生入佛知見不爲人天二乘小事故云所作佛事也
若一人獨得滅度餘人不得者所作佛事卽爲有廢
廢卽令衆不得實益豈得會皆實不虛云何皆實昔
云我坐道場不得一法實七方便並非究竟滅二涅

槃者方便空拳故知唯虛未見皆實若昔施七權遂
不得入一實者可言其虛虛引得出無有虛出而不
入實者故知昔虛爲實故也皆實不虛佛事無廢卽
此義矣如是我成佛甚大久遠下明非滅現滅又二
初明非滅現滅二從如來以是方便下明現滅利益
初又二先明本實不滅次從然今下明迹中唱滅我
成佛已來下明果位常常故不滅寄此四字明未來
大勢威猛常住益物也從我本行下舉因況果以明
常住舊人據此以證無常云前過恒沙後倍上數神
通延壽猶是無常僻取文意大有所失經舉因況果

果非數也經云久修業所得壽命無數劫非神通延
壽也何者佛修圓因登初住時已得常壽常壽叵盡
已倍上數況復果耶云何棄所況之果苟執能況之
因縱令此因已是於常非無常也譬如太子時祿已
不可盡況登尊極祿用寧可盡乎明文在茲何須迴
換疑誤後生耶然今非實下第二迹中唱滅三身並
有非滅唱滅義如淨名云法本不生今則無滅卽是
法身非滅又云是寂滅義卽是唱滅也何者若已了
達不唱寂滅爲未了者唱耳若言照寂卽是唱滅若
言寂照卽是唱生夫法身者雖非生非滅亦有生滅

法華文句卷下
若迷心執著卽煩惱生而智慧滅若解心無染卽智
慧生煩惱滅滅惑生解此是無常滅若解生惑滅卽
是寂滅此之生滅悉約法性而辨若無迷解二緣則
不唱有此生滅也報身非滅唱滅者誰有智慧誰有
煩惱而言智慧能破此卽明闇不相除卽報身不滅
義衆生未了聞此便謂其卽是佛而生憍恣不復修
道故復唱言道能滅惑有煩惱時則無智慧有智慧
時則無煩惱豈非智慧能滅煩惱耶應身非滅唱滅
者應是法報之用體旣無滅用豈有窮卽應身不滅
但爲衆生若常見佛則生憍恣故唱我於今夜當取

滅度又法身當體明不滅報身說不滅必約法身以
理而論智慧能破爲到故破不到故破爲共爲獨如
此推理無有能破之功卽智慧不滅惑義就有智慧
則無煩惱卽是慧能滅惑應身說不滅須約法報法
報常然應用不絕衆生不盡卽不滅度若法身當體
論不生滅報身了達無能生滅應身相續不生滅

云

從以是方便教化下第二明現滅益物又爲二先
不滅衆生有損二從以方便說比丘當知下若唱滅
者於物有益初又二初不滅有損次廣釋不滅有損
者如前樂小法人見佛常在不種善根貧窮下賤不

法華文句卷之十
生二善故無益見思不斷不斷二惡則是有損貪著
五欲入於憶想憶想卽是見惑五欲卽是思惑也由
此衆生垢重故須唱滅不唱滅則二惡生而不滅二
善損而不生若依四悉檀現滅則二惡滅二善生爲
滅二惡故用對治第一義第一義滅未生惡對治滅
已生惡世界爲人生二善世界生未生善爲人生已
生善又世界滅已生惡對治滅未生惡如禪五陰滅
欲界惡卽是世界滅已生惡爲人生已生善第一義
生未生無爲之善若見下第二廣釋若見佛常在便
起憍恣心等故有損不能生恭敬故無益憍恣卽增

見惑厭怠卽生思惑不生難遭想卽不能生見諦解
不恭敬卽不能生思惟道爲是義故宜應現滅若見
聞三佛不滅悉有憍恣義便謂衆生如彌勒如一如
無二如平等卽真由是生於憍心上慢謂一切煩惱
本自不生今亦無滅何須修道卽便恣情放逸爲是
唱言是寂滅義又聞一切衆生卽菩提相菩提相卽
煩惱相明暗不相除顯出佛菩提衆生聞此復起慢
恣不復修善懈怠放逸爲是等故唱言報身智慧能
滅煩惱無明力大佛菩提智之所能滅應身非滅現
滅易解若唱言法本不生今亦不滅要須滅惑方乃

寂滅經云智慧不滅煩惱然明時無暗汝今具足煩惱何能有慧當知智慧能滅障惑衆生聞是唱滅便於三佛生難遭想起恭敬心是故如來以方便下明唱滅有益先歎佛難值次釋難值三佛並難值衆生樂著小法見思障重聞三身不滅則不修道難得契會也所以下釋也諸薄德人過百千劫或有見佛或不見者若見三佛其人多善少惡不爲其人唱滅是人見佛常在靈山也或不見佛其人障重善輕爲說三身難會衆生聞之便作是念三佛雖復非生非滅必須生善滅惑乃得證見此事不易故云難遭也心

懷戀慕渴仰者此明現滅無損滅於見思名無損種善根名有益又善男子下第二大段結三世益物物得實益又爲三先明諸佛出五濁必先三後一先近後遠次明皆是爲化衆生後明皆非虛妄也譬如下第二譬說有開譬合譬開譬爲二一良醫治子譬譬上三世應化所宜二治子實益譬譬上三世利物不虛上未來文少此中具有就初爲三一醫遠行譬譬過去益物二還已復去譬現在應化三尋復來歸譬未來應化過去文爲二一發近顯遠二明過去應化所宜今但譬應化所宜所宜有三一處所二拂迹疑

三正應化今但譬應化應化又二一機感二正應化
今具譬之如有良醫者超譬上我以佛眼觀有能應
之智也從多諸子息是追譬上若有衆生來至我所
能感之機也上應化所宜又二一益物二明歡喜今
但譬益物上益物又二一非生現生二非滅現滅今
但譬現滅初良醫者醫有十種一者治病病增無損
或時致死譬空見外道恣意行惡教人起邪斷善根
法身既亾慧命亦死二者治病不增不損譬有見苦
行外道投巖赴火苦行行善不得禪定不能斷結卽
是無損亦不能斷善卽是不增也三者治病損而無

增但世醫所治差已還復生卽是修定斷結外道也
四者治病能令差已不復發而所治不徧卽二乘人
止治一兩種有緣者不能徧治一切也五者雖能兼
徧而無巧術用治苦痛釋論呼爲拙度卽是六度菩
薩慈悲廣治也六治病妙術治無痛惱而不能治必
死之人譬通教菩薩體法但治有反復凡夫不治焦
種二乘也七雖治難愈之病而不一時治一切病卽
是別教菩薩也八能一時治一切病而不能令平復
如本卽圓教初心十信也九能徧治一切亦能平復
如本而不能令過本卽圓教後心也十一時治一切

病卽能平復又使過本卽是如來前三種醫卽大經中之舊醫用乳藥也後七並客醫無術者但用無常苦等法如用辛苦酢藥也有術遠來還令服乳最後究竟良醫也良者善也內有三達五眼卽是八術妙得藥性善治者外識病源能用藥也智慧者權實二智深知二諦也聰達者五眼鑒機頓漸不差也十二部教文理甚深如明鍊方藥依四悉檀治衆生病如善治衆病也無量義云醫王大醫王以大醫故稱爲良醫多諸子息若十聲聞二十支佛百數菩薩菩薩之子凡有三種子義一就一切衆生皆有二種性德

佛性卽是佛子故云其中衆生悉是吾子此文云多諸子息也約十心數法卽有百子心王爲正因佛性慧是了因性餘九相扶起屬緣因性一數起時九數扶助如是成百也性德佛子非善非惡而通善惡故此十數及與心王爲通心數是以性德三因悉屬正因佛子二者就昔結緣爲佛子如十六王子覆講法華時聞法者亦生微解卽成了因性昔微能修行爲緣因性正性爲本此三因並屬緣因資發今日一實之解故以昔日結緣爲緣因佛子卽火宅中三十子也此約十信一信起時卽具餘九還有百信故得結

緣爲佛子也三者了因之子卽是今日聞法華經安
住實智中我定當作佛決了聲聞法是諸經之王從
佛口生得佛法分故名真子此亦有三因性今旣顯
了見於佛性並屬了因佛子百子之義還將十數入
十善法中十信入初住中是故正因通於本末此文
明百子不取了因子了因子屬下不失心服藥中明
之以有事緣遠至他國者譬過去應化中現滅也諸
子於後下第二還已復去譬現世益物又二一諸子
於後飲毒譬上機應相關見諸衆生德薄垢重衆生
於佛滅後樂著三界邪師之法故云飲他毒藥卽是

遊行詣他國輪轉諸趣墮在三界故云宛轉于地是
時其父還來歸家下譬上我少出家得三菩提第二
非生現生也上有二形聲及利益不虛今言諸子飲
毒去譬上形益信受邪師之法名爲飲毒失心是無
大小機感生不失心是有大小機感生又失心者貪
著三界失先所種三乘善根也爲是人非滅唱滅不
失心者雖著五欲而不失三乘善根爲是人故非生
現生善強惡輕見佛卽能修道斷結如子見父求藥
病愈善輕惡重得見佛亦求護而不修道如子見父
求救不肯服藥父爲此子唱言應歿逢見者明佛出

法華經卷之九
世時衆生亦見色身而爲見思障隔五分不得親奉
法身故云逢也見聞佛出皆有喜敬之事現諸經文
梵王請等例是求救之辭也父見子等苦下譬上聲
益又二初譬佛受請轉二諦法輪也而作是言下譬
誠勸經方者卽十二部教也藥草卽教所詮八萬法
門也從佛出十二部乃至出涅槃此出漸頓藥草也
直從佛出十二部此出頓藥草也從佛出修多羅此
出漸藥草也色者譬戒戒防身口事相彰顯也香者
譬定功德香熏一切也味者譬慧能得理味也此戒
定慧卽入正道修入正道能見佛性又色是般若照

了法性之色分明無礙香是解脫斷德離臭也味是
法身理味也三法不縱不橫名秘密藏依教修行得
入此藏也說三乘空三昧力如擣無相如篩無作如
合一一三昧具戒定慧也又空觀如擣假觀如篩中
觀如合此三觀各不離戒定慧將此法與漸頓衆生
令修行名服也從而作是言乃至可服卽是勸門也
從速除苦惱乃至無復衆患卽是誠門也將誠勸二
教令諸衆生服法藥也其諸子中不失心者下譬上
得益不虛上有二一不虛次釋不虛今云其諸子中
不失心者服藥病差卽譬上皆實不虛也釋不虛不

作譬也

妙法蓮華經文句卷第十上

天台智者大師說

從餘失心者下譬上非滅現滅上有二一不久應死
譬上非滅現滅二諸子醒悟譬上唱滅利益又唱死
之由由子不服譬上薄德見佛常在但增憍恣上現
滅中有二一本實不滅二非滅唱滅不出現滅之由
由亦是唱滅利益中今譬不譬第一而明現滅之由
正由衆生薄德見佛不修行卽是不肯服藥也我今
當設下正唱應死譬非滅唱滅此中明衰老爲二一
擬宜去住譬上住有損滅有益二卽作是言下唱應

死正譬現滅化期將竟也死時已至者當入涅槃也
留經教在故云是好良藥今留在此復至他國者卽
是此方現滅他方現生上文云願在他方逢見守護
卽其義也遣使者或取涅槃中大聲普告爲使人或
用神通或用舍利或用經教等爲使人今用四依菩
薩語衆生云佛已滅度但留此法我今宣弘汝當受
行也後時衆生若無四依傳述經法豈能自知佛已
滅度故用四依是使人也二是時諸子下諸子醒悟
譬現滅利益上文有二一明損益二釋損益今但譬
得益此中自惟孤露下明滅後得益如優波笈多所

化之流也又爲二一現滅利益二是未來機感良由
滅後衆生醒悟服藥修行以作因緣能感未來應化
如遺教云其未度者作得度因緣亦有現得感見普
賢觀云精進苦到得見釋迦分身多寶東方善德等
及七佛世尊第三其父聞子悉已得差下卽是未來
益物威猛之力父聞子差卽機感使見之卽是起未
來之應化方將形聲兩益也如文從諸善男子於意
云何下牒不虛譬明三世利益不虛也從佛言我亦
如是去明合譬也成佛已來無量劫者合過去世也
方便力言當滅度合現在世也文略不合未來亦無

能說我虛妄合益物不虛也偈二十五行半頌上法
譬初二十行半頌法說次五行頌譬說上法說有二
今頌亦二初十九行半頌三世益物次一行頌皆實
不虛初四行頌過去世益物爲三初一行頌上成道
已久次常說法下第二一行頌上中間益物次爲度
衆生下第三二行頌上住處次衆見我下第二五行
頌現在上文有二初二行半頌非生現生次我時語
下第二二行半頌非滅現滅次我見諸下第三十行
半頌上未來上但寄常住不滅四字今頌則廣文爲
四初我見下一行半明未來機應次神通力如是下

第二四行頌上常住不滅常在靈鷲山此謂實報土
也及餘諸住處者謂方便有餘土也卽上餘國義也
天人充滿者三十心是人十地是天擊天鼓者無問
自說也曼陀羅華者說賢聖位也次我淨土下第三
二行明不見因緣次諸有修功德下第四三行明得
見因緣次汝等有智下第二一行頌上利益不虛也
次五行頌譬爲二一行頌開譬爲三初一句頌過去
爲治下二句頌現在不頌未來也無能說下第三一
句頌不虛後我亦爲下第二四行頌合譬上合中本
不合未來今初半行頌合過去次凡夫下第二二行

半頌合現在後每自作下第三一行頌合不虛開三
顯一開近顯遠欲令衆生速入佛道此事必得不虛
也

釋分別功德品

佛說壽量二世弟子得種種益故言功德淺深不同
故言分別品也此文是本門第二授記段論分此文
有法力修行力法力者有五 一證二信三供養皆如
今品四聞法如隨喜品五讀誦持說讀誦如法師功
德品持者追指法師安樂行勸持三品說者如神力
囑累品也修行力者苦修行力如藥王教化如妙音護

難如觀音陀羅尼示功德如妙莊嚴王護法如普賢
品也光宅云一約功德門記其行進現在修因二約
智慧門記其損生未來得果三明外凡發心夫授記
通因果此三通是授記耳下八世界發心應在初列
以外凡聞經發心住三十心三十心聞經始出內凡
登於初地得無生忍初地聞經進入二地得聞持二
地聞經得入三地名樂說辯三地聞經入四地得無
量旋四地聞經入五地名不退五地入六地名清淨
輪小千已去約損生門授記七地已斷無明惑惑有
九品能爲九生作因從七地已上果報無有期限難

可得判但斷九品煩惱爲言煩惱品數百千萬種今約一種九品作義七地所斷作下上二品乃至十地所斷亦作上下二品金剛心所斷作一品六地聞經登七地下忍斷一品所餘八品在爲八生作因故云八生當得菩提七地上忍復斷一品卽損二品生餘七品爲七生作因七生當得菩提諸品例有上下一品盡損一生文略故從八地乃至四生餘有一生卽金剛心斷之法也法華論云得無生忍者謂入初地證智應知從八生乃至一生得菩提者謂諸凡夫決定能證初地隨分生及一生則證菩提菩提者離三

界分段生死隨分能見真如佛性名得菩提非謂究竟滿足菩提今謂論前深後淺光宅前淺後深二彼相拒世孰判之夫無生法忍經論不同迦旃延子明五法成就獲不退轉六度菩薩位也須陀洹若智若斷是菩薩無生法忍者三乘共位也登初地得無生忍者別菩薩位也登初住得無生法忍者圓菩薩位也皆聖教明文不可參濫又淨名近無等等得無生忍仁王云至金剛頂皆名伏忍亦名寂滅忍蓋是別圓地地通途之意不可定用卽光宅以發心爲內凡三十心位爲無生忍是初地皆別家名教非通家門

戶從初地至六地呼爲福德門大經稱有爲有漏名
聲聞僧則通教意耳七地已上斷九品生因者小乘
大乘得入位人誰不斷惑未足定判若言七地斷無
明者非通又非別乃是別接通意耳光宅游漾不會
今經天親以發心爲無生忍從八生至一生凡夫決
定斷果報生盡得入初地獲無生忍者專據別義亦
不會經今分文爲三一經家揔序二如來分別三時
衆供養揔序如文分別者佛語圓妙不可用權位釋
經故上文開示悟入佛之知見今本門增道損生皆
約圓位解釋下八世界發心者六根清淨人初入十

信位也故仁王云十善菩薩發大心長別三界苦輪
海卽此義也得無生忍入十住位也故華嚴云初發
心住一發一切發得如來一身無量身清淨妙法身
湛然應一切卽此義也得聞持陀羅尼入十行位也
得樂說辯才入十迴向位也得無量旋陀羅尼入初
地也得不退入二地也得清淨入三地也八生入四
地也七生入五地也六生入六地也五生入七地也
四生入八地也三生入九地也二生入十地也一生
入等覺金剛心若論增道損生不如光宅斷因生之
生不如天親斷果報之生但約智德論增約斷德論

損約法身論生約無明論滅例如大經月喻從初一日至十五日光色漸增從十六日至三十日光色漸減約一月體而論增減喻約法身而論智斷或可一人一時有八番增或可一世或八世或無量世或可一念或可八念或無量念或可衆微塵數人亦如是是故不可以因生果生局之不可離張智斷釋之然本門得道數倍衆經非但數多又熏修日久元本垂迹處處開引中間相值數數成熟今世五味節節調伏收羅結撮歸會法華譬如田家春生夏長耕種耘治秋收冬藏一時獲刈自法華已後有得道者如摺

拾耳三時衆供養者聞深遠法得大饒益欲報佛恩而設供養亦是寄事以表領解上迹門菩薩亦悟而大事未畢所以不陳本門既竟彌勒摠申領解明諸菩薩執持幡蓋次第而上至于梵天幡者轉義蓋者覆義地者始義梵者淨義智斷番番轉慈悲番番覆高下深淺不失次第際于梵天表諸菩薩增道損生鄰于妙覺極於極淨若作天親解者只得初地一番豈得與此文會耶偈有十九行分爲三初二行頌時衆得解次九行頌如來分別後八行頌時衆供養得無量無漏清淨之果報者揀異二乘有量故言無量

妙因所感故言清淨無障礙土故言果報異二乘無報也聞佛壽無量此文定判爲無量何得用舊解有量○南師從偈後長行下屬流通段引上迹門文殊現在亦是流通北師以四信弟子現在聞經判屬正說從又如來滅後下乃是流通二家盡可用今且依南方從偈後凡十一品半分爲二一從此下至不輕品明弘經功德深勸流通二從神力品下八品付囑流通各復有三此半品及隨喜品明初品因功德勸流通二從法師功德明初品果功德勸流通不輕品引信毀罪福證勸流通後三者神力囑累囑累流通

藥王下五品約化他勸流通普賢約自行勸流通生起者現在聞經得真似兩解益如上說若直聞一句而生隨喜如現在四信格其功德未來無佛恐人疑福少故說滅後五品功德也因功德微密未若果功德彰灼故說法師功德品因果雙舉未若引證分明故說不輕雖舉往人未若現變故說神力雖示神力未若摩頂付囑故說囑累雖通途囑累未若示其要術棄身存道故說藥王雖誠能化未若誠其所化隨聞法處應生佛想故說妙音觀音若初心弘經旣無神力當依內禁故說陀羅尼復須外護故說嚴王普

法華文句卷下
賢聯翩重疊使大法弘通耳就偈後長行爲二一現
在四信二滅後五品云何四信略解三人廣說二人
觀成一人信通四人故言四信也四信者一一念信
解未能演說二略解言趣三廣爲他說四深信觀成
初一念信解有長行偈頌長行有三一舉示其人二
明功德三位行不退今釋一念信解者謂隨所聞處
豁爾開明隨語而入無有罣礙信一切法皆是佛法
又信佛法不隔一切法不得佛法不得一切法而見
一切法亦見佛法卽一而三卽三而一亦是行於非
道通達佛道行於佛道通達一切道不得佛道一切

道而通達佛道一切道無所有而有而有無所有非
所有非無所有如門前路通達一切東西南北幢無
壅礙眼耳鼻舌身意凡有所對悉亦如是無疑曰信
明了曰解是爲一念信解心也若坐思惟隨所思惟
豁然開悟通達三諦亦復如是如是信解名鐵輪位
又一解未是具足鐵輪乃是十信之初心其人未得
六根清淨故非鐵輪正位也次格量者先摠論無量
次格量多少爲二初舉五度爲格量本般若卽是今
之正慧故言除般若也問旣離般若則五不名度答
皆爲求佛慧盡施戒邊亦得名度蓋次第意也以是

功德下第二正格多少也若善男子下第三明位行不退別六心猶退七心不退圓初住心卽不退聞壽量功德自外而資圓順信解自內而熏所以不退六品云有菩薩退有不退有魔無魔皆此義也偈十九行半初十二行先頌格量多少次二行追頌人相後五行半頌行位不退無量劫行道者久修諸度也願我於未來者起慈悲願也藉久行願聞經信解今之初品始聞此經一念信解功等久行亦乃過之也又阿逸多聞佛壽長遠是第二品前但信解未能敷說說涉名數須善方言今品具足故言爲他解說從勝

受名名第二品以說力故能起自他無上之慧此文先標人相次格量也何況廣聞此經下第三品廣聞廣解廣爲他說廣修供養供養外資令內智疾入能生一切種智先出人相次格量也阿逸多下第四人備上三品加修觀行入禪用慧想成相起能見有餘實報兩土相貌見佛共比丘僧常在耆山者方便有餘土相也又見娑婆純諸菩薩者實報相也初二品是聞慧位廣聞廣說是思慧位觀行想成是修慧位自淺之深成六根清淨十信位也又如來滅後下明五品文爲二先列五品格量四品功德後隨喜品格

量初品功德問何故爾答四品粗格量初品廣格量
廣格量已況出勝者可以意得佛不煩文巧說若此
也五品者一直起隨喜心二加自受持讀誦三加勸
他受持讀誦四加兼行六度五加正行六度此五人
者通論皆自行化他下文云五十人展轉相教也既
皆有自行通稱弟子皆有化他通稱法師也別論二
人但自行三人具化他作法師往名在三不在五自
行既通所以皆稱弟子也初品標人而已格量在後
說何況下第二品況出能受持讀誦者是也標人可
解從斯人頂戴下是格量也初心畏緣所紛動妨修

正業直專持此經卽上供養廢事存理所益弘多後
心理觀若熟涉外不妨內事資於道如油多火猛若
順流而揚帆又加功力其勢轉疾也指經文是法身
舍利不須安生身舍利文詮所詮能詮是塔不須事
塔經文能容第一義僧不俟相從僧也問若爾持經
卽是第一義戒何故復言能持戒者答此明初品意
不應以後品作難若欲釋者持經卽順理戒亦是任
運持得初篇二篇今言能持戒者第三篇去事中無
虧耳第三品復能教他者是也先標人從起立下格
量也況復有人下第四品復能兼行六度者是也先

標人從其德最勝下格量也若人讀誦下第五品復能正行六度是也先標人從若我滅後下格量也結此五品前三人是聞慧位兼行六度思慧位正行六度是修慧位都是十信前耳或云初隨喜品是入信心位分一品爲兩心五品卽十信心卽是鐵輪六根清淨位也偈十九行半初五行半頌第二品次若能持下三行頌第三品若有信解下四行頌第四品次恭敬下七行頌第五品生心如佛想者初依人號如來也不久詣道樹者其位在鐵輪不久得入銅輪能八相作佛也已趣道場者行處也三菩提者近處也

此第五品與第四信齊同是修慧位若論入位同是六根清淨位也而有現未佛世滅後之異耳云云釋隨喜功德品

隨者隨順事理無二無別喜是慶已慶人聞深奧法順理有實功德順事有權功德慶已有智慧慶人有慈悲權實智斷合而說之故言隨喜功德品又順理者聞佛本地深遠深遠信順不逆無一毫之疑滯順事者聞佛三世益物橫豎該亘徧一切處亦無一毫疑滯卽廣事而達深理卽深理而達廣事不二而二不別而別雖二雖別無二無別如此信解名之爲隨

如來出世四十餘年不顯真實七方便人不語誠諦
慶我及人以凡夫心等佛所知用所生眼同如來見
如此知見究竟法界廣無涯底無等無等等更無過
上佛今說此我得聞此故名隨喜功德品第五十人
是初品之初初但有一念理解但有一念慶已慶他
未有事行恩不及人所獲功德如來巧喻功蓋無學
況復最初於會聞者況復二三四五品者況復入位
十住十行乃至後心者誰聞如是深妙功德而不景
慕如來說此令物尚之故言隨喜功德品上來稱美
持經功德時衆咸謂入真因位乃致斯德於初心之

初起輕弱想忽聞好堅處地芽已百圍頰伽在穀聲
勝衆鳥希有竒特輕疑釋然故名隨喜功德品外道
得五通者能移山竭海而不伏見愛不及煖法人二
乘無學子果俱脫猶被涅槃縛不知其因果俱權通
教人修因雖巧發心不識五百由旬得果止除四住
別人雖勝二乘修因則偏其門又拙非佛所讚皆不
及初隨喜人佛今舉阿以況後茶都勝諸教故言隨
喜功德品問此與大品隨喜云何答此法彼人人法
互舉文有問答各長行偈頌前品已格四人不說初
者彌勒承機問出此義如文佛答爲二初答內心隨

喜人二直明外聽法人初爲五一展轉相教二格量本三問四答五正格量南方解五十人爲三一展轉勝二展轉平三展轉劣勝者難得平者亦希劣者比是格劣況出平勝北方人解最初妙覺爲第十地人說十地人爲第九地人說如是展轉至于十信格後況初今謂不爾佛明言初品於會中聞傳傳相教展轉五十格後況初後非十信之始初非妙覺之終何用此解此解窮深不會經旨今爲二一橫約諸教四衆二直約圓教數之三藏有四門一一門有四衆更開沙彌沙彌尼合六人四門則二十四人約信行法

行則四十八人最初最後合五十人通別四門亦如是直就圓門數者數法有小七大七大七有七七四十九皆是師弟具自行化他之德最後一人但是自解無教他德故格下以顯上耳格量中先與世樂拔果苦後與涅槃樂拔生歿苦此是略舉梵福今更廣之滿閻浮人福不及西瞿耶尼一人福滿西瞿人福不及東弗婆提一人福滿三天下人福不及北鬱單越一人福滿四天下人福不及一四天王四天王不及一釋乃至第六天不及一梵福梵福有定散散者無塔處作塔塔壞者治之和合僧衆請轉法輪衆散

者還合之是爲四福與梵天等故言梵福也聖福者
謂阿羅漢住最後身得有餘涅槃者是也又有體法
三乘人同學無生斷煩惱盡如燒木成炭又薩埵聖
福自行化他俱以無言說道斷煩惱入無餘又薩埵
福謂從初發心次第化人入大涅槃如是格量梵福
不及聖福聖福不及體聖福體聖福不及小薩埵福
小薩埵福不及大薩埵福大薩埵福不及聞法華經
初隨喜福何以故彼非佛法故非實故非圓故雖佳
後果不及我初心其義如是私謂勸人聽法從與陀
羅尼菩薩共生一處至人相具足合有五十功德將

功德目人亦成五十但上五十論內解隨喜今唯論
外事爲異也又此文亦有六根功德利根智慧是意
功德不瘖瘂舌功德鼻修高直鼻功德見佛眼功德
聞法耳功德餘是身功德前是相似位功德今是相
似位前功德耳聽經文爲四一自往二分座三勸他
四具聽修行云云偈十八行爲二初九行頌隨喜次
若有勸下第二九行頌聽經隨喜中三前一行半頌
五十人次最後人下第二五行半頌格量本次最後
下第三二行頌格量略不頌福甚多後九行頌聽經
小不次第爲四初五行超頌勸聽經次若故詣下第

二二行追頌自往次若於講法下第三一行頌分座
次何況下第四一行頌修行云云

釋法師功德品

法師義如上說功德者前謂初品之初功德今五品
之上謂六根清淨內外莊嚴五根清淨名外莊嚴意
根清淨名內莊嚴又從地獄已上至佛而還一切色
像悉身中現者名內莊嚴從地獄已上佛已還一切
色像以普現三昧而外化者名外莊嚴身根既爾餘
五根亦然讀誦既爾四種亦然初品既爾四品加然
相似既爾分真倍然行者聞說此功德利喜不自勝

勤求無厭信進倍增明識大乘有大勢力決無疑網
似解之初初過二乘之極極百千萬倍指始顯終懸
解究竟第一義諦不可思議此品所明備斯四意故
言法師功德品也六根功德者光宅云三業合十善
一善具十爲百自行化他隨喜讚歎合四百約五種
法師爲二千三品分之卽六千功德此土三根用弱
奪言八百三根用強與言千二與奪合論還是六千
也有人明數與光宅同下品八百中品一千上品千
二百諸師偏釋未會今經亦不合諸教大品云色淨
故般若淨般若淨故色淨色淨五根淨般若淨意根

淨若六根等云何判上中下強弱用耶若一強一不
強一淨一不淨一上品餘非上品云云正法華整足
具六千功德不論上中下云云法華論云凡人以經
力故得勝根用雖未入初地以父母所生肉眼見大
千內外也大經云如來一根則能見色聞聲嗅香別
味覺觸知法今經六根清淨與小品同以是功德莊
嚴六根與正法華同鼻見色聞聲覺知與涅槃同肉
眼有天眼慧法佛眼等用與論同文義如此不可以
偏見抑正經今當說之光宅數整足根不依文今按
三業安樂行卽有十善一善有十卽百善一善中有

十如卽千善就化他爲二千約如來室如來衣如來
座卽成六千五種法師悉具六根清淨一一根皆有
一千功德也復次一心中具十法界一一界皆有十
如卽成一百一根通取六塵卽有六百約定慧二莊
嚴卽是一千二百根根悉用定慧莊嚴等千二百也
若論六根清淨清淨則不言功德若少若多若言莊
嚴能盈能縮能等等莊嚴者根根六千若言千二顯
其能盈若言八百顯其能縮若言清淨無盈無縮無
等六根互用根自在故不可思議故若偏判者則失
旨也相似之位若依四輪卽鐵輪位也若依五十二

法華文句卷一
位卽十信心也若依仁王卽十善大心也今對常精
進者卽十信之第三心也諸經名目雖異同是圓教
相似位耳文爲二初摠列六根盈縮功德數次別作
六章解釋各有長行偈頌眼根章明父母所生名肉
眼而所見過於天眼梵王報得天眼在已界徧見大
千大千外有風輪與眼作障不能見外若在他界則
不徧見大千非所統故小羅漢見小千大羅漢見大
千辟支佛見百佛世界不以風輪爲礙亦無已他界
隔今經論眼能見大千內外應是天眼那名肉眼此
是圓教似位因經之力有勝根用旣未發真不得稱

天眼猶名肉眼例如小乘方便未得神通則不稱天
眼耳猶是分段之身故稱父母所生雖稱肉眼具五
眼用見大千內外天眼用見一切衆生及業因緣法
眼用其目甚清淨慧眼用一時悉見大千內外見業
見淨又圓伏法界上惑佛眼用大經云雖有肉眼名
爲佛眼佛眼故名清淨具五眼故故言莊嚴能盈能
縮名勝根用名根自在豈可祇作八百千二百解耶
耳根章徧聞大千內外十法界音聲聞六道卽肉天
二耳聞二乘卽慧耳聞菩薩卽法耳聞佛卽佛耳又
父母所生肉眼能聞內外卽天耳聽之不著卽慧耳

法華文句卷十一
不謬卽法耳一時互聞卽佛耳以耳例眼眼亦如是
見人天是二眼見二乘是慧眼見菩薩是法眼見佛
卽佛眼云鼻根章亦如是父母所生卽肉鼻大千
內外卽天鼻不染不著卽慧鼻分別不謬卽法鼻一
時互用卽佛鼻此章明互用者鼻知好惡別貴賤觀
天宮莊嚴等則鼻有眼用讀經說法聞香能知鼻有
耳用諸樹花果實及蘇油香氣鼻有舌用入禪出禪
禪有八觸故五欲嬉戲亦是觸法鼻有身用染欲癡
恚心亦知修善者鼻有意用鼻根自在勝用若茲例
五根亦如是舌根章亦如是父母所生卽是肉舌能

作十法界語約此卽是五舌義明矣能作十法界語
卽天舌不壞卽慧舌不謬卽法舌一時互用卽佛舌
云問苦澀惡味至舌皆變成上味衆色到眼何不
變成妙色舊不例味有損益損者變不損者不變諸
色不壞眼故不例今解不爾一切色同佛色一切聲
同佛聲等皆清淨例則無妨徧知一切色法聲法無
亂無謬分別亦無妨自在之根那作頑礙之解耶身
根章亦如是世間所有皆於身中現肉身用也上至
有頂於身中現天身用也二乘身中現慧身用也菩
薩於身中現法身用也佛於身中現佛身用也一時

圓現一時互用一時無謬一時無著云意根章亦如是世間資生產業皆順正法人意淨天心所行天所動作悉知天意淨四月卽四諦一歲卽十二月是十二因緣與實相不相違背卽慧意淨一月卽一乘菩薩意淨有所思量皆是先佛經中所說卽佛意淨一時圓明一時圓互一時無染一時無謬根用自在能盈能縮能等能淨云釋常不輕菩薩品

內懷不輕之解外敬不輕之境身立不輕之行口宣不輕之教人作不輕之目不輕之解者法華論云此

菩薩知衆生有佛性不敢輕之佛性有五正因佛性通亘本當緣了佛性種子本有非適今也果性果果性定當得之決不虛也是名不輕之解將解以歷人彼亦如此是名敬不輕之境敬此境故名不輕之行宣此語故名不輕之教昔毀者以此目人今經家以此目品見實三昧云佛爲父王說一切皆是佛王問一切衆生卽是佛不佛答若如實見衆生於其卽是佛私類此語若不如實見佛於其則非聖譬初學射的多乖少當以地爲的無往不著若分別賢聖孰是孰非如實觀之卽是佛也初是因緣解後是圓教解

云 此品引人爲證證五品功德深六根報重我昔
隨喜獲現生後報以募流通也文有長行偈頌長行
爲三一雙指前品罪福二雙開今品信毀三雙勸後
二逆順雙指者先指罪如法師品說次指福如功德
品說如文第二雙開信毀者有事本本事事本有時
節名號劫國說法等悉如文第二從最初威音王下
是明本事又三初明時節二於像法中下雙標兩人
名毀者因時名增上慢信者因時名常不輕次第三
得大勢下雙明得失得失又二初就信者論得得正
說之宏宗得流通之妙益名常不輕是人一凡有所

見是理一皆悉禮拜是行一而作是言是教一此是
開權顯實之四一也從乃至遠見下是本理一故往
禮拜是本行一而作是言是本教一少人一其義可
解此是開近顯遠之四一也文云不專讀誦經典但
行禮拜者此是初隨喜人之位也隨喜一切法悉有
安樂性皆一實相隨喜一切人皆有三佛性讀誦經
典卽了因性皆行菩薩道卽緣因性不敢輕慢而復
深敬者卽正因性敬人敬法不起諍競卽隨喜意也
不輕深敬是如來座也忍於打罵是著如來衣也以
慈悲心常行不替卽如來室也又深敬是意業不輕

之說是口業故往禮拜是身業此三與慈悲俱卽誓願安樂行也如此三四豈非流通之妙益而謂何耶從四衆之中下第二明毀者之失生瞋恚心不淨者不受四一也罵言無智智知於理旣言無智不受理一也比丘卽不受人一也從何所來不受行一也虛妄授記不受教一也經歷多年常被罵者結不受開權顯實之四一也避走遠住高聲唱言亦復不受此不受開近顯遠本地之四一也常作是語故結信者深信不休也四衆爲作不輕名者此結毀者皆毀不止也問釋迦出世踟躕不說常不輕一見造次而言

何也答本已有善釋迦以小而將護之本未有善不輕以大而強毒之

云

云

從臨欲終時下雙明信毀果

報初文爲二一明果報二結會古今信者論三報現得六根清淨生值燈明佛後值二千億佛神通力是身業淨樂說辯力是口業淨善寂力是意業淨

云

云

結會又二初結會如文從若我宿世下第二是舉信者而勸順也如文從彼時四衆下明毀者果報又二先明得果後結古今毀者得善惡兩果詢故墮惡聞佛性名毒鼓之力獲善果報結古今又二初結古今次從當知下舉逆以顯順勸持以遮毀經有大力終

感大果務當勤習五種之行偈有十九行半初十五
行半但頌信毀因果後四行頌勸持在文可見不細
出也著法者是法不可示若定謂是有卽是著法乃
至定謂是非有非無亦名著法者佛藏云刀輪害閻
浮人其失猶少有所得心說大乘者其罪過彼也云
云大論云執有與無諍乃至執非有非無與有無諍
如牛皮龍繩俱不免患中論云諸佛說空法本爲化
於有若有著空者諸佛所不化若定言諸法非有非
無者是名愚癡論若失四悉檀意自行化他皆名著
法若得四悉檀意自他俱無著也

妙法蓮華經文
句卷第十上

妙法蓮華經文句卷第十下

天台 智者 大師說

○釋如來神力品

如來者上釋竟神名不測力名幹用不測則天然之
體深幹用則轉變之力大此中爲付囑深法現十種
大力故名神力品自此品下凡有八品是付囑流通
今品明菩薩受命弘經次品如來摩頂付累文有長
行偈頌長行爲三一菩薩受命二佛現神力三結要
勸持初經家叙敬儀次發誓弘經弘經爲三一時節
佛滅後是也二處所分身等國是也三誓願非但奉

命益他亦自願此真淨大法兼濟俱美也從爾時下
是第二現十神力爲二初所對之衆次正現神力於
文殊等者迹化衆也舊住者下方本化衆也一切者
他方來者及從分身佛來者也問但見下方發誓不
見文殊等發誓何也答上文云我土自有菩薩能持
此經卽兼得之也十神力者一吐舌相者今經所演
開三顯一內祕外現廢近顯遠明三世益物皆誠諦
不虛福德人舌至鼻三藏佛至髮際今至梵天出過
凡聖之外極於淨天之頂相旣殊常說彌可信二通
身毛孔徧體放光周照十方無處不朗表智境罄也

上白毫吐耀始在東方表七方便初見一理今本門
旣竟放一切光照一切土能令初因終于等覺究竟
佛慧分身諸佛亦復如是三謦咳者將語之狀也亦
是通暢之相也四十餘年隱秘真實今獲伸舒無有
遺滯是我出世大事通暢是故謦咳欲以此法付諸
菩薩令於後世導利衆生將語斯事是故謦咳謦咳
具二義一咳咳事了一咳咳付他也四彈指者隨喜
也隨喜七方便同入圓道隨喜圓道增智損生隨喜
諸菩薩持真淨大法隨喜後世獲無上寶此一彈指
豎徹三世橫亙十方五地六種動者表初心至後心

六番動無明今明復動一切人六根令得清淨也六
普見大會者表諸佛道同也而今而後亦復如是上
五千起去三變被移既失本心不能現益宜以非滅
現滅從諸菩薩弘經得道入於佛慧如今會無異亦
表未來有機一也七空中唱聲者表於未來有教一
也八南無歸命爲佛弟子表於未來有人一也九遙
散諸物雲聚而來者表未來有行一也十十方通同
如一佛土者表理一也問何以知十相表現意復表
將來意答文云我以如來神力爲囑累此經故猶不
能盡表現表將其義明矣從爾時佛告上行下是第

三結要付囑文爲四一稱歎付囑二結要付囑三勸
獎付囑四釋付囑初歎如文結要有四句一切法者
一切皆佛法也此結一切皆妙名也一切力者通達
無礙具八自在在此結妙用也一切秘藏者徧一切處
皆是實相此結妙體也一切深事者因果是深事此
結妙宗也皆於此經宣示顯說者揔結一經唯四而
已撮其樞柄而授與之從是故汝等下三是獎勸付
囑如文從所以者何下四是釋付囑也上云經卷所
在之處皆應起塔經中要說要在四事道場釋上甚
深之事得菩提釋上秘藏轉法輪釋上一切法入涅槃

槃釋上神力此之四要攝經文盡故皆應起塔也所言要者得菩提是法身轉法輪是般若入涅槃是解脫三法成秘密藏佛住其中卽是塔義也阿含云佛出世唯四處起塔生處得道處轉法輪入涅槃坐道場是法身生處餘悉如文偈有十六行初四行頌十神力次十二行頌結要囑累下二行是人之功德揔頌四法能持則爲已見我下第二八行半別頌四法初一偈半頌一切法持法卽持佛身云云令我及分身兩偈頌神力神力勸佛令歡喜諸佛坐道場一偈頌秘要可解於諸法之義四偈頌甚深之事說法破

闇入一乘是佛甚深之事也後一偈半揔頌結也

釋囑累品

囑是佛所付囑累是煩爾宣傳此從聖旨得名故言囑累囑是頂受所囑累是甘而弗勞此從菩薩敬順得名故言囑累囑是如來金口所囑累是菩薩丹心頂荷此從授受合論故言囑累品也是故如來躬從座起申手摩頂授以難得之法大眾曲躬合掌如世尊勅當具奉行殷勤授受故名囑累品也文爲二初付囑次時衆歡喜初爲三一如來付囑二菩薩領受三事畢唱散初三一正付二釋付三誠付正付者

佛以一權智善巧之手摩三千三百那由他國土側塞虛空諸菩薩實智之頂如來授道化他故名權智手也菩薩自行受道故名實智頂也若申手摩頂卽身付囑也權智臨實智卽意付囑也而作是言者卽口付囑也文有四悉檀意我於無量劫修是難得之法者此從前佛受學今以付爾爾當授彼三世繼嗣卽世界悉檀也一心流布卽爲人悉檀也廣令增者卽對治悉檀也益者卽第一義悉檀也所以者何下釋付也有大慈悲者如來室也無諸慳悋者如來衣也亦無所畏者如來座也佛之智慧者一切智也如

來智慧者道種智也自然智慧者一切種智也於如來室中能施衆生三種智慧乃至座中亦復如是如是施主故無慳悋故無所畏汝等當學如來此法是名釋出佛意而付囑之從於未來世下是誠付者若根深智利直說佛慧若不堪者於餘深法中示教利喜佛慧是深而非餘六方便是餘而非深別教次第是餘亦是深汝能以餘深助申佛慧者卽善巧報佛之恩是名誠付囑也從時諸菩薩下是第二領受歡喜意領受曲躬低頭是身領受俱發聲言是口領受兼得意領受也如世尊勅者領受大施主如來室意

當具奉行領受無慳恪如來衣意願不有慮領受無
所畏如來座意佛既二付菩薩三受皆如文爾時釋
迦下是第三唱散多寶爲證經故來今迹本二門已
訖故須敬遣如故分身爲開塔故集開塔事了故令
分身還本塔不可重開故分身去而不現塔猶聽法
故閉而尚在問塔若聽法亦應不閉答證正已故閉
聽流通故在云從說是語時下是大衆歡喜諸佛
爲化他事遂故喜菩薩爲自行得法故喜又說人清
淨故喜佛是也聞清淨法故喜妙經是也聞法獲證
故喜現在未來得益者是也三事具足故大歡喜云

釋藥王菩薩本事品

觀經曰昔名星光從尊者日藏聞說佛慧以雪山上
藥供養衆僧願我未來能治衆生身心兩病舉世歡
喜號曰藥王此文明一切衆生喜見頓捨一身復燒
兩臂輕生重法命殞道存舉昔顯今故言本事品也
若推此義星光應在喜見之後從捨藥發誓已來名
藥王故云此下五品皆是化他流通今品明化他
之師唯願大法大得弘宣大願衆生獲大饒益所以
竭其神力盡其形命殷殷虔虔志猶未已庶令弟子
宗法如師我傳爾明爾復傳明明無已師之志也

故知此品勗弘法之師也下如妙音觀音兩品明他
方大士奉命弘經普現色身形無定準不可牛羊眼
看不可以凡庸識度於所聞處勿生輕想輕想則法
不染心故知下品勗受法弟子也有人言上諸品諸
佛爲佛事此品下菩薩爲佛事此一往耳上品亦有
菩薩此下品亦有諸佛云云今明方便品開三顯一
圓因已竟安樂行品明乘乘之法壽量明乘果已竟
此品下明乘乘之人故十二門論云大乘者普賢文
殊大人之所乘也藥王以苦行乘乘妙音觀音以三
昧乘乘陀羅尼以總持乘乘妙莊嚴以誓願乘乘普

賢以神通乘乘作此解者於化他流通義便也文爲
四一問二答三利益四多寶稱善問爲三一通問遊
化二別問苦行三請答如文二答爲二一但答苦行
者遊化則指色身三昧或指下二品也二歎經答苦
行中先明事本次明本事事本爲三謂時節有佛聲
聞國土等悉如文本事爲三一佛說法二修供養三
結會然佛普爲一切何獨喜見其是對揚須付流通
如今之身子寄一而言諸耳苦行又二一現在二未
來現在又二一修行得法二作念報恩報恩又二一
三昧力二正報身力身力爲三一燒身二佛稱歎三

法華經卷第七
時節真法供養者當是內運智觀觀煩惱因果皆用
空慧蕩之故言真法也又觀若身若火能供所供皆
是實相誰燒誰然能供所供皆不可得故名真法也
一切衆生下未來苦行又爲五一生王家二說本事
三往佛所四如來付囑五奉命任持悉如文任持又
四一起塔二燒臂三利益四現報悉如文佛告下是
第三結會古今又爲二一結會二勸修勸修者能然
一指勝捨外身外輕內重故功福有異文云妻子者
外身也國城等外財也從若復有人以七寶下歎經
先歎能持者次歎所持法後明持福深七寶奉四聖

不如持一偈法是聖師能生能養能成能榮莫過於
法故人輕法重也宿王下第二歎所持法又二初歎
法體次歎法用川流江河諸水之中海爲第一者無
量義云四水譬教藥草喻中一雲能雨譬說今更諸
水揔一切教別舉四者譬乳酪生熟四味教也此法
華教譬醍醐海也說窮本地爲深徧一切處爲大純
明佛法不說餘法爲鹹最爲深大其義如是十寶山
名出華嚴及衆經云云土黑鐵圍故非是寶十山雖
寶或一或二神龍雜居須彌四寶所成純天所住譬
餘教說能依十地四十心或凡或賢或聖說所依或

俗或真或中是爲卑下此法華經所說諦理常樂我
淨如四寶所成開示悟入者之所依是故此義最爲
高上星月同是陰精俱於夜現星無虧盈不及於月
諸經說權智不得自在此經明權卽實實卽權盈虧
相指不二而二如此說權智勝餘教也日是陽精獨
能破闇諸經明實智破惑尚不及卽實而權那得並
卽權而實故知此經明實智最爲第一輪王號令止
在四域釋齊三十三梵號令揔上冠下譬餘經說三
諦三昧各不相收不得自在此經所說以實相入真
決了聲聞法是諸經之王實相入俗一切治生產業

不相違背實相入中諸法無非佛法文云一切學無
學及發菩薩心者之父其義如是一切凡夫四果支
佛第一者此明任運無功用也餘經要因功用乃得
入流如四果人因聞思修方乃得悟此經明無作四
諦不雜方便自然流入薩婆若海如大白牛肥壯多
力其疾如風云聲聞支佛菩薩爲第一者此明因
第一也餘經明因是七方便今經明因出方便外故
因第一也如來第一者此明果也餘經明果近在寂
場此經明果遠指本地故最第一此經能救下歎法
用初歎拔苦用次十二事歎與樂用後結皆如文從

若人得聞下明持經福深先舉全聞經福次舉聞品
福有格量有囑累如文口出香是現報餘是後報得
聞是經不老不死者此須觀解不老是樂不灰是常
聞於此經得常樂之解坦然在懷無所畏忌說是下
是第三聞品得益如文第四多寶稱善如文
釋妙音菩薩品

文中自釋昔奉雲雷音王佛十萬種妓今遊化他土
音樂自隨昔奉八萬四千寶鉢今爾許道器眷屬圍
遶昔得一切衆生語言陀羅尼今以普現色身以妙
音聲徧吼十方弘宣此教故名妙音品此品明菩薩

以難思之力隨類通經物覩其迹莫測其本但甘其
味無擇其形當卑其地自壅其流卽是化他門中第
二意也文爲六一放光東召二奉命西來三十方弘
經四二土得益五還歸本國六聞品進道大人相者
大相海也徧體毛功德不及一好功德衆好功德不
及一相功德諸相從下向上展轉相勝不及白毫功
德白毫功德不及肉髻功德故是大人相也此相業
者從孝順師長起今放是光召本弟子使弘中道之
經利益大機者也白毫從一道清淨起今放此光令
弘此法也問佛一一相皆法界海何故勝負答他經

法苑珠林卷二十一
所明宜作此說耳問佛有緣弟子布滿十方何故召
東說西不論八方耶答此有所表淨名云日月何意
行闇浮提欲以光明除衆闇暝東是光始西是其終
有始有終其唯聖人乎未發心者令其發心未究竟
者令其究竟一菩薩既爾諸衆亦然一方既爾諸方
亦然聖不煩文舉一蔽諸故但言東西耳發來文爲
二一發來緣二正發來來緣爲六一經家叙其福慧
二被照三辭四誠五受旨六現來相叙福之由由值
先佛多也甚深智慧卽智慧莊嚴十六三昧卽福德
莊嚴也光照身辭佛悉如文佛誠者然法身大士故

不肅而成所將眷屬或未達者故寄彼而規此耳夫
佛身與理相稱不得見卑小而忘其尊嚴此約如來
座爲誠也夫師及弟子智斷具足師既施權弟子亦
隱其實此約如來衣爲誠也夫依報國土皆正報所
感如來以慈臨大千宜須高須下勿覩依報而忽正
報也此約如來室爲誠也此佛弘經亦勅三意彼尊
誠約諸佛道同也受旨者如來力是座力神通亦是
室力莊嚴力是衣力此受弘經之大旨利物之宗要
故能不動此會遊化十方焉現相文爲六一遣蓮花
二問三答四請五推功六命來悉如文問若文殊位

下辭不應求見若文殊位高相來那忽不識答雖同
一位有始中終止此一事不知無忝高位又衆中見
瑞不了發起令知故問佛耳從于時下是發來文爲
六一與眷屬經歷二叙相登臺三問訊傳旨四請見
多寶五世尊爲通六塔中稱善悉如文第三弘經爲
二問答初問種何善根二問有是神力善根是問昔
神力是問今佛還答二意昔獻樂奉器仍結古今悉
如文此答其種善根之問從華德下答其神力之問
示三十四凡身四聖人身結成十法界六道耳爾時
華德下是問今住何定而能如此自在利益佛答如

文說是品下是第四二土利益三昧與陀羅尼體一
而用異寂用爲三昧持用名陀羅尼又色身變現名
三昧音聲辯說名陀羅尼上品云初得一切色身三
昧轉身得一切語言陀羅尼當知音聲猶是色法故
言體一用異又舌根清淨名陀羅尼餘根清淨名三
昧都是六根清淨法門耳爾時妙音下第五還本土
動地雨花者菩薩經歷尚能傍益況佛前放光傍照
東方百八萬億那由他土亦傍論利益也第六聞品
進道如文

釋觀世音菩薩普門品

法華文句卷二
此品是當途王經講者甚衆今之解釋不與他同別
有私記兩卷略撮彼釋此題有通有別通有十雙別
有五隻十雙者一人法乃至第十智斷云云觀世音
者人也普門者法也人有多種云云法有多種云云
依前問答論觀世音人依後問答論普門法人法合
題故言觀世音普門品二觀世音者大悲拔苦依前
問答百千苦惱皆得解脫普門者大慈與樂依後問
答應以得度而爲說法也三觀世音者智慧莊嚴智
能斷惑如明時無闇普門者福德莊嚴福能轉壽如
珠雨寶者也四觀世音者觀冥於境卽法身也普門

者隨所應現卽應身也五觀世音者譬藥樹王徧體
愈病普門者譬如意珠王隨意所與六觀世音者冥
作利益無所見聞三毒七難皆離二求兩願皆滿也
普門者顯作利益目覩三十三聖容耳聞十九尊教
也七觀世音者隨自意照實智也普門者隨於他意
照權智也八觀世音者不動本際也普門者迹任方
圓也九觀世音者根本是了因種子普門者根本是
緣因種子也十觀世音者究竟是智德如十四夜月
光也普門者究竟是斷德如二十九夜月邪輝將盡
也經文兩問答含無量義略用十雙始從人法終至

法華文句卷二
三

智斷釋品通名其義如是別論五隻者一觀也觀有多種謂析觀體觀次第觀圓觀析觀者減色入空也體觀者卽色是空也次第觀者從析觀乃至圓觀也圓觀者卽析觀是實相乃至次第觀亦實相也今簡三觀唯論圓觀文云普門觀若不圓門不稱普卽此義也世者若就於行先世後觀若就言說先觀後世今從說便故後論世世亦多種謂有爲世無爲世二邊世不思議世有爲世者三界世也無爲世者二涅槃也二邊世者生歿涅槃也不思議世者實相境也簡卻諸世但取不思議世也音者機也機亦多種人

天機二乘機菩薩機佛機人天機者諸惡莫作諸善奉行也二乘機者厭畏生歿欣尚無爲也菩薩機者先人後已慈悲仁讓也佛機者一切諸法中悉以等觀入一切無礙人一道出生歿也揀卻諸音之機唯取佛音之機而設應以此機應因緣故名觀世音也普者周徧也諸法無量若不得普則是偏法若得普者則是圓法故思益云一切法邪一切法正略約十法明普得此意已類一切法無不是普所謂慈悲普弘誓普修行普離惑普入法門普神通普方便普說法普成就衆生普供養諸佛普始自人天終至菩薩

法華文句卷二
十四
皆有慈悲然有普有不普生法兩緣慈體既偏被緣
不廣不得稱普無緣與實相體同其理既圓慈靡不
徧如磁石吸鐵任運相應如此慈悲徧薰一切名慈
悲普弘誓普者弘廣也誓制也廣制要心故言弘誓
弘誓約四諦起若約有作無生無量四諦者收法不
盡不名爲普若約無作四諦者名弘誓普也修行普
者例如佛未值定光佛前凡有所修不與理合從得
記已觸事卽理理智歷法而修行者無行而不普也
斷惑普者若用一切智道種智斷四住塵沙等惑如
卻枝條不名斷惑普若用一切種智斷無明者五住

皆盡如除根本名斷惑普入法門普者道前名修方
便道後所入名入法門若二乘以一心入一定一心
作一不得衆多又爲定所縛故不名普若歷別諸地
淺深階差亦不名普若入王三昧一切三昧悉入其
中不起滅定現諸威儀故名法門普神通普者大羅
漢天眼照大千支佛照百佛世界菩薩照恒沙世界
皆緣境狹發通亦偏若緣實相修者一發一切發相
似神通如上說況真神通而非普耶方便普者二種
道前方便修行中攝道後又二一者法體如入法門
中說二者化用如今說逗機利物稱適緣宜一時圓

徧雖復種種運爲於法性實際而無損減是名方便
普說法普者能以一妙音稱十法界機隨其宜類俱
令解脫如修羅琴故名說法普成就衆生普者一切
世間及出世間所有事業皆菩薩所爲鑿井造舟神
農嘗藥雲蔭日照利益衆生乃至利益一切賢聖示
教利喜令人三菩提是名成就衆生普供養諸佛普
者若作外事供養以一時一食一花一香普供養一
切佛無前無後一時等供於一塵中出種種塵亦復
如是若作內觀者圓智導衆行圓智名爲佛衆行資
圓智卽是供養佛若行資餘智不名供養普衆行資

圓智是名供養普門者從假入空空通而假壅從空
入假假通而空壅偏通則非普壅故非門中道非空
非假正通實相雙照二諦故名普正通故名門普門
圓通義則無量略舉其十類則可知此品猶是普現
三昧化他流通也文爲三一問二答三聞品得益問
答兩番初番問爲二初經家敘時者說東方菩薩竟
次說西方菩薩時也其一說東方生善竟次說西方生
善時其二說東方斷疑竟次說西方斷疑時其三說東方
得道竟次說西方得道時其四無盡意者大品明空則
無盡大集明八十無盡門淨名云夫無盡者非盡非

法華經卷下
無盡故名無盡。惣三經用三觀三智釋無盡也。意者智也無盡者境也。智契於境單從於境應言無盡。單從於智應言於意境。智合稱故言無盡意也。一又意者世出世之本也。二又意卽法界中道故言能觀心性名爲上定。三此約三智三觀釋名也。與問者大經云具二莊嚴能問能答無盡意。前以慧莊嚴問觀世音。慧莊嚴佛以慧莊嚴答觀世音。慧莊嚴也。佛答爲三一。惣答二。別答三。勸持名答。惣爲四。一人數二。遭苦三。聞名稱號四。得解脫。自有多苦苦一人多人受一苦一人受多苦一人受少苦。今文百千萬億衆生

多人也。受諸苦惱多苦也。舉多顯少。多尚能救。况少苦耶。遭苦是惡。稱名是善。善惡合爲機義也。而得解脫是應也。此是機感因緣名觀世音。亦是人法因緣。乃至智斷因緣名觀世音。後去例如如此。結名不煩。文別答爲三一。口機應二。意機應三。身機應口。又二。初明七難。次結火難爲四。一持名是善。二遭火是惡。三應四結於一難中。例爲三。番一果報火地獄。已上初禪已還。皆論機應。二惡業火地獄。已上非想已還。皆論機應。三煩惱火地獄。已上等覺已還。皆論機應。七難三毒二求。例皆如此。此義旣廣。可以意知。不可文。

記身機爲二初二求次結求男有立願修行德業求
女文略修行正言禮拜是同故略之願業各異故重
出之結如文從是故衆生下是勸持名爲三勸持格
量結歎上述勝名美德不辨形質若欲歸崇宜持名
字是故勸持也入大乘論云法身唯一應色則多格
六十二億應等一法身也智者云圓人唯一偏人則
多格六十二億偏菩薩等一圓菩薩也第二番問爲
三云何遊問身云何說問口方便問意此聖人三密
無謀之權隨機適應也佛答亦三一別答二摠答三
勸供養應以者答方便力也現身答其問遊也說法

答其問口也凡有三十三身十九說法

云

從成就

下結別開摠別文廣意狹摠答文狹意廣

云

從是

故下勸供養此中見形聞法故勸供養也初勸次受

旨受旨爲六奉命不受重奉佛勸卽受結皆如文從

持地下是聞品功德

云

無等等者九法界心不能

等理佛法界心能等此理故無等而等也又畢竟之
理是無等初緣畢竟理而發心能等於理故言無等
等也又心之與理俱不可得將何物等何物而言無
等等耶心之與理俱不可說不可說而說說此心等
此理故言無等等耳初一是橫釋次一是豎釋次一

非橫非豎釋也 云云

釋陀羅尼品

此翻惣持惣持惡不起善不失 其一又翻能遮能持能

持善能遮惡 其二此能遮邊惡能持中善 其三眾經開

遮不同或專用治病如那達居士或專護法如此文

或專用滅罪如方等或通用治病滅罪護經如請觀

音或大明呪無上明呪無等等明呪則非治病非滅

罪非護經若通方者亦應兼若論別者幸須依經勿

乖教 云云諸師或說呪者是鬼神王名稱其王名部

落敬主不敢為非故能降伏一切鬼魅 其一或云呪者

如軍中之密號唱號相應無所訶問若不相應即執

治罪若不順呪者頭破七分若順呪者則無過失 其二

或云呪者密默治惡惡自休息譬如微賤從此國逃

彼國訛稱王子彼國以公主妻之多瞋難事有一明

人從其國來主往說之其人語主若當瞋時說偈偈

云無親遊他國欺誑一切人麤食是常事何勞復作

瞋說是偈時默然瞋歇後不復瞋是主及一切人但

聞斯偈皆不知意呪亦如是密默遮惡餘無識者 其三

或云呪者是諸佛密語如王索先陀婆一切羣下無

有能識唯有智臣乃能知之呪亦如是祇是一法徧

有諸力病愈罪除善生道合其爲此義故皆存本音
譯人不翻意在此也惡世弘經喜多惱難以呪護之
使道流通也文爲四一問持經功德二答甚多三請
以呪護四聞品得益一問如文二答有格量本問多
不答甚多格出功德如文請說呪有五番一藥王二
勇施三毗沙門四持國五女藥王爲四一請二說
三歎四印下例有三如文十女爲五一系列名二請說
三歎四誓五印夜叉翻捷疾鬼羅刹翻食人鬼二部
是北方所領者富單那熱病鬼吉遮起尸鬼若人若
夜叉俱有此鬼毗陀羅赤色鬼捷陀羅黃色鬼未詳烏

摩勒烏色鬼未詳阿跋摩羅青色鬼阿梨樹枝墮地法
爾破爲七片弒父母破僧是三逆罪外國油者擣麻
使生蟲合壓之規多汁益肥此過尤也斗秤輕出重
入欺盜之尤近世有小斗出大斗入震銘其背斯罪
亦不輕也

釋妙莊嚴王本事品

此因緣出他經昔佛末法有四比丘於法華經極生
殷重雖卷舒祕教甘露未霑日夜翹誠畧刻無忘歎
云苟非其人乎地非其處乎世間紛愀靜散相乖直
爾求閑尚須厭棄況崇道乎於是結契山林志欣佛

法苑珠林卷之二十一
二十
慧幽居日積衣糧單罄有待多煩無時不之一餐喀
喀廢萬里之行十旬九飯屈雲霄之志可得言哉其
一人云吾等四窮尚不存身法當安寄君三人者但
以命奉道莫慮朝中我一人者捨此身力誓給所須
於是振錫門問以求供繼自春至冬周而復始如僕
奉大家甘苦無喜愠三人得展其誠功圓事辦一世
之益當無量生其一人者數涉人間屢逢聲色坏器
未火難可護持偶逢王出車馬駢闐旌旗喻赫生心
動念愛彼光榮功德薰修隨念受報人中天上常得
爲王福雖不貲亦有限也三人得道會而議云我免

籠樊功由此王其耽果報增長有爲從此死已不復
爲王方沈火坑良難可救幸其未苦正可開化其一
人云此王著欲而復邪見若非愛鈎無由可拔一人
可爲端正婦二作聰明兒兒婦之言必當從順如宜
設化果獲改邪婦者妙音菩薩是昔二子者今藥王
藥上二菩薩是昔時王者今華德菩薩是所以白毫
東召升紫臺而西引神呪護經使流通而大益說四
聖之前緣故名妙莊嚴王本事品又妙莊嚴者妙法
功德莊嚴諸根也此王往日於妙法有緣道熏時熟
諸根應淨生雖未獲其理必臻靈瑞感通嘉名早立

例如善吉雖未無諍已號空生故下文云得清淨功德莊嚴三昧以是義故名妙莊嚴王也前品說呪護今品說人護人護尚爾呪護彌良普勸流通也文爲六一明事本二雙標能所三能化方便四所化得益五結會古今六聞品悟道事本如文彼佛法中下第二雙標能所所化一人能化三人俱出其名別顯二子福慧六度四弘餘經指此爲十波羅蜜橫法門也三十七助道豎法門也餘經爲正道行行爲助道今經指十度爲正呼此是助道也禪度中具有三昧道品中節節有三昧更標七三昧者廣顯法門耳從時彼佛下第三能化方便文爲三一時至二論議三現化初時至者彼佛出世常宣正法於王緣弱則非其時若說法華則其時矣文云彼佛將欲引導說法華經卽其義也第二論議文中子白母時至母讓令化父子怨出邪見家母責令憂念悉如文從於是二子下是第三現化現化應十八變可具釋之從時父見子下第四所化得益文爲十一信子伏師王觀邪變或一或二狹而且陋見子所作歎未曾有信其子而伏其師問師是誰我亦願見二父王已信宮中八萬四千又熟白母稱慶願放出家母亦聽之三重催父

母今正其時佛難值故四化功已著佛歎功德法華
三昧者攝一切法歸一實相如前說離惡趣者一往
以三途爲惡趣具論二十五有皆乖真起妄悉是惡
趣今皆離之卽二十五三昧破二十五有也佛集三
昧者卽秘密之藏佛集其中唯佛行處非餘人也五
俱詣佛所聞法供養見瑞歡喜六佛與受記七出家
修行八稱歎二子九佛述行高十歎佛自誓佛讚善
知識大有義善知識能作佛事此則外護善知識示
教利喜者此則教授善知識所謂化導令得見佛者
此則同行善知識令入菩提此則實際實相善知識

雜阿含云善知識者若貞良妻此卽外護義又善知
識者如宗親財此卽同行義又善知識如商主導此
卽教授義又善知識如子卧父懷此卽實際義也佛
告大衆下是結會古今先結會次結歎二菩薩也說
是下聞品得道如文

釋普賢菩薩勸發品

大論觀經同名徧吉此經稱普賢皆漢語梵音邨輸
毘陀此云普賢悲華云我誓於穢惡世界行菩薩道
使得嚴淨我行要當勝諸菩薩寶藏佛言以是因緣
今改汝字名爲普賢此卽三悉檀意復是因緣解釋

又是行願得名由來從於念處至四善根通稱為普
賢別約世第一法鄰真近聖稱之為賢此三藏中說
耳今明伏道之頂其因周徧曰普斷道之後鄰于極
聖曰賢若十信是伏道之始非頂非周鄰于初聖之
初非後非極乃至第十地亦非周極況前諸位乎今
論等覺之位居眾伏之頂伏道周徧故名為普斷道
纔盡所較無幾鄰終際極故名為賢釋論引十四夜
月如十五夜月斯義明矣此約圓教位釋後位普賢
也勸發者戀法之辭也逢在彼國具聞此經始末既
周欲令自行化他永永無已故自東自西而來勸發

具四悉檀意

云

云

文云我為供養法華經故自現其

身若見我身甚大歡喜

其一

已見我故轉復精進即得

三昧及陀羅尼

其二

得是陀羅尼故無有非人能破壞

者亦復不為女人之所惑亂

其三

三千大千世界微塵

菩薩具普賢道

其四

如此明文即四悉檀而來勸發也

上判流通為三從十九行偈已後三品半舉經力大

以勸流通藥王品下五品舉菩薩化道力大以勸流

通此一品舉普賢誓願力大以勸流通分文為四一

發來二勸發三述發四發益初經家敘發來為三一

上供二下化三修敬自在者理一也神通者行一也

威德者人一也名聞者教一也又自在者常也神通者樂也威德者我也名聞者淨也言說如此卽一而四德無不備自在義焉淨力故雨花樂力故奏伎神通故動地自在力故隨意而雨隨去隨雨隨動隨奏譬如大龍飛行不息身邊雲雨流起無窮普賢及眷屬以菩薩身用四德力來勸發四一所逕歷處自行上供其事如此從又與諸天龍下所逕歷處下化利益隨他所宜現八部像略用二力隨所堪任其事如此三者修敬身旋面禮如文勸發爲二一請問勸發二誓願勸發有問有答問者遙聞經竟戀法無已遠

來之志志在勸發是故更請正說勸發自行更請流通勸發化他如來若許二途再演光光無極是故雙請也佛答先揔次別三結別列四法名如文其旣雙請如來巧答略舉四以蔽諸何者四法之要該括正通何者佛雖無偏若能遠惡從善反迷還正開權知見顯佛知見者則稱可聖心諸佛護念若佛知見開則般若照明是植衆德本亦是入正定聚不亂不味不取不捨亦是發救衆生當知此四與開權顯實名異體同無二無別又佛護念者是開佛知見植衆德本是示佛知見發救衆生是悟佛知見入正定聚是

法華文句卷二
三五
入佛知見迹門之要此四收矣又迹則有本從本開
示悟入故有迹中開示悟入今開迹卽顯本本迹無
二無別以四法答其請正於義明矣以四法答請流
通流通之方唯三唯四發救衆生是入如來室入正
定聚佛所護念是著如來衣植衆德本是坐如來座
是弘宣之要卽四而三發救衆生是誓願安樂行入
正定聚是意安樂行植衆德本是口安樂行護念是
身安樂行當知後四卽前四也一答酬其兩請舉四
冠罩一經法華之重演斯經之再宣遠來之勸發其
義如此三結者於如來滅後必得是經舊云能行四

法於未來世常手得是經今謂不爾上文云諸法實
相義已爲汝等說又云咸令衆生開示悟入佛之知
見蓋法華之正體能行四法必得此解名解爲經此
結其請正之問若能運此解行傳與他人他人得斯
信解成初依人能得真解成第二第三第四依人此
結其請流通之問此意不見浪作餘說耶白佛下第
二誓願勸發文爲二一護人二護法護人爲六一攘
其外難初揔攘其難故言使無伺求得其便者是也
次別攘其難舉十二非是也二教其內法凡三番教
訓初行立讀誦乘六牙白象安慰其心次坐思惟復

乘六牙教示其經與其三昧也陀羅尼旋假入空也
百千旋者旋空出假也方便者二爲方便道得入中
道第一義諦也後三七一心精進復乘六牙示教利
喜說呪如文三覆以神力若聞若持莫非神力如文
四示勝因若能五種法師卽三世佛所爲種爲熟爲
脫此人同未來諸佛得脫故言同普賢行此人已於
先佛植善故言深種善根此人爲現佛所熟故言手
摩其頭五示近果但能書寫近在忉利具五法師次
在兜率如文六摠結是故智者下是也從世尊我今
神力下是第二誓願護法如文第三述發者卽是如

來舉勝述成其劣增進行者勇以弘宣先述護法云
汝能如是外多利益內積慈悲又久劫已來作如此
護我亦以佛之神力守護是法況復汝耶如文從若
有人下述其護人雖不次第述成意足當知是人則
見釋迦牟尼佛者述其示身教法其尚見我萬德果
身況汝因中六牙白象其尚從佛口具足聞經況汝
所教忘失章句其尚爲佛口讚手摩佛衣所覆況汝
因人陀羅尼覆耶從不貪著世樂下述其舉因廣舉
因中無諸過惡少欲知足修普賢行述勝因也從若
如來滅後下述其舉近果也其人當詣道場必成遠

法華文句卷第二
果況近果耶亦於現世得其近果不但生天也從若
人輕毀下述其能攘外難佛廣示毀者之罪令知過
必改不相惱亂非但持經者難滅亦乃欲毀者福生
無毀無難彼此安樂曠濟無偏慈之至也從應起遠
迎當如敬佛述其結信者功德第四從說是下發益
之文也一聞品益旋陀羅尼是初地位具普賢道是
十地位二聞經益大眾歡喜是也歡喜如前說此中
云何猶稱聲聞乃是經家存其本位耳又經家稱其
是大乘聲聞以佛道聲令一切聞斯義彌顯也
妙法蓮華經文句卷第十下

